


أنيس منصور

القلب ابداً يد



حسين النون
94

دار الشروق



كل يوم جمعة تذهب إلى المكتب وحدها . ومعها باقة ورد . .
السائق يفتح لها الباب . ويغلقه ويتركها وحدها . . ويذهب إلى
المقهى يجلس مع زملائه . . ويدور الكلام عادة عن الصحة
والفلوس والستر . . وعن الناس الذين لا يملكون المال ولا يملكون
الراحة . . والذين عندهم المال والعمل وليس عندهم أولاد . .
والذين عندهم أولاد وليس عندهم فلوس . .

- على كل نحمده على الصحة وراحة البال . . لا مال . . ولا
عيال . . ولا وجع قلب . .

والكلام فيه إسقاط من بعيد على هذه السيدة التي يعمل
عندها . . والكلام من زبائن القهوة بهذا المعنى . . وإن كان أحد
منهم لا يشير إلى هذه السيدة بصفة خاصة . .

وينظر السائق في ساعته ويطلب مزيدًا من الشاي فما يزال هناك
وقت . .

أما السيدة لطيفة الزهيرى فهى ترتدى ملابس الحداد . . وتجلس
فى قاعة كبيرة على مقعد له عجلات . . وقد وضعت الورد فى إحدى
الزهريات . .

وتتوقف بمقعدها أمام كل صورة على الحائط .

وتعود بذاكرتها إلى أيام زمان . .

وأول صورة هى صورة طفلة فى السابعة من عمرها . . حلوة
سعيدة وتعود إلى الماضى . .

إنها ابنتها أمل حياتها . . ابنتها الأولى تعلقت بها تماما واسمها
هى الأخرى لطيفة . . ذهبت إلى أحد الأندية الرياضية انشغلت
عنها أمها فى مكالمة تليفونية . . وكل أبنائها الحاليين يغارون من حبها
لهذه الطفلة .

المكالمة أن زوجها قد وقع فى المكتب وانهار بسبب الإرهاق ذهبت
إلى المكتب . . وذهبت معه إلى المستشفى . . ولكنه بسرعة أسعفوه
وعاد إلى البيت سليماً . وتذكرت أنها نسيت ابنتها فى النادى . .
طلبتها فلم تجدها . . أرسلت إليها بالسائق يأتى بها . . وكانت
الطفلة قد غرقت . . وأخفت الحادث عن زوجها وقالت إنها ذهبت
تلعب مع بنت خالتها . . وسوف تبيت عندها . . ونسيت أن اليوم
عيد ميلادها . . وقبل أن يخرج الأب من البيت ليعد للاحتفال بعيد
ميلاد ابنته الوحيدة فى أحد الفنادق الكبرى . . تنهار الأم وتبكى لأن
البنت غرقت . . وأما هى فترقد فى أحد المستشفيات . .

وتبكي الأم وتمسح دموعها وهي تقف أمام صورة ابنتها . .
وتنتقل بمقعدها ذى العجلات إلى الصورة التى تليها . .
إنها صورة زوجها . . والزوج كان مشلولاً يتحرك على هذا المقعد
لأنه رجل كله حيوية ومرح . . له منظار وشارب وله كرش أيضاً . .
وتعود إلى الذى كان أيام الخطوبة . .

وأيام الزواج . . وإلى الحفلات والرحلات والمشاريع التى
أقامها . . وأقامتها شركته . . فهى شركة للبناء والأثاث . . والقرى
السياحية . . وهو رجل طيب يحب الناس والناس يحبونه . . وهو
يجب الأطفال ويعطف على الفقراء . . ويزور المرضى من عماله . .
ويذهب إليهم فى بيوتهم - وكان يعمل كثيراً . . يأكل فى مكتبه . .
وأحياناً ينام فى المكتب . .

وكان عنده أمل أنه إذا فرغ من بناء إحدى القرى السياحية أن
يتنحى عن العمل . . ويكتفى بما جمع من مال وأن يبعث بأولاده إلى
الخارج . . الولد يكون مهندساً والبنات التى اسمها لطيفة أيضاً
تشتغل بالإدارة . . لتدير مع زوجته بعض الأعمال . . كأن يكون لهما
سوبر ماركت . . ويكون ذلك لشغل الفراغ . . أما الفلوس فعندهما
الكثير . . وعندهما حدائق وفلل فى القاهرة وعلى شاطئ الإسكندرية .
وكان يطمع فى أن تتزوج ابنته مهندساً معمارياً أيضاً . . وأن يتزوج
ابنه مهندسة معمارية وأن يكون كل الأولاد مهندسين . .

ولم يجترس المهندس خليل الزهيرى من الإرهاق الشديد والسهر

المتواصل والتوتر . . رغم أن الأطباء قد نصحوه كثيراً . وانهار أكثر من مرة في مكتبه . وكان ذلك دليلاً على أنه معرض لأن يموت في مكتبه . . ولكنه استراح بعض الوقت واستعاد نشاطه . . وكانت النتيجة التي توقعها كل الناس إلا هو . .

* * *

ووقفت أمام صورة لسيدة تشبهها . . إنها أمها . . وكان من رأى أمها ألا تتزوج ابن عمها هذا . . فهو مريض منذ البداية وقد حذرنا الناس من ذلك . ولكن السيدة لطيفة أصرت على ذلك . . فهو حبها الأول . . والأعمار بيد الله . . وكانت الأم قد عرضت عليها عددًا من شباب الأسرة ورجالها . . ولكن لطيفة رفضت وأصرت على زوجها خليل . . وقالت لها أمها إن هناك شبابا ورجالاً . . وإن هناك شابًا أقسم ألا يتزوج . . وسوف يظل في انتظارها . . وبعضهم على يقين بأنها لن تطيق الحياة مع ابن عمها . . أو أنه سوف يموت . . وهم يصرحون بذلك دون خوف أو دون حرج . .

* * *

أمام صورة طفلة صغيرة . . عمرها سنة أو أقل . . إنها أول خلفتها الثانية التي ولدت لتموت بعد شهور من ولادتها ولأسباب غامضة . . وقد حدث شجار بينها وبين أمها . . تطلب إليها أن تترك زوجها . . إنه مريض وأولاده لا يعيشون . . وأخوه الأكبر كان

كذلك .. ففى دماء هذا الفرع من الأسرة شىء ما .. جرثومة ..
تؤدى إلى موت الأطفال صغارًا .. وعادت الأم تقدم لها رجلاً
آخرين ..

ومن بينهم واحد هو الذى أقسم بأن يتظرها حتى يموت ..
وصورته تظهر لحظات فقط .. حتى يكون ظهوره فيما بعد
مفاجأة .. وحتى يحكى هو بنفسه قصة هذا الحب والانتظار ..

* * *

وأخيراً صورة زوجها .. وكان شاباً وسيماً .. راكباً حصاناً وسط
مزرعة دواجن .. المزرعة كانت تملكها وتديرها .. ومنذ سقط هذا
الشاب الذى هو زوجها من فوق الحصان وأصيب بالشلل لم تعد إلى
هذه المزرعة .. باعته .. وهى أول مشروع خاص بها .. قد أقامه
زوجها ليشغلها لما وجد أنها تحب الطيور .. الكتاكيت والبط
والأرانب .. كأنها تعوض بذلك عن فقدانها لصغارها الواحد بعد
الآخر ..

وكما هى العادة تكمل الدوران حول منضدة كبيرة فى قاعة
الاجتماعات .. وتترك المقعد ذا العجلات عند رأس التريزة
الكبيرة .. وتنهض على رجلها .. وتخرج من باب المكتب .. لتجد
السائق فى انتظارها !



في مكتبها الكبير تجلس على كرسى يتحرك وتجد متعة في أن تنتقل
به وهي جالسة عليه لا تبرحه من مكان إلى مكان . . كأنها مشلولة أو
كأنها لا تريد أن تنسى زوجها مرة واحدة . .

وقد اتخذت ملامح حادة ولكنها ليست قاسية . . مع ابتسامة
خفيفة . فهي حزينة . وهي وحيدة . ثم إن العمل أكبر من قدرتها
والمشاغل أكثر من احتماها . .

تضغط على زرار . .

تجيء السكرتيرة ومعها أوراق ومواعيد ودعوات . .

وتركز السكرتيرة على الدعوات إلى العشاء والغداء . . وأعياد
الميلاد والأفراح . .

وتقول السيدة لطيفة : ابعثي وردًا . . واعتذري . .

.. ولكننا نعتذر طوال الوقت . .

- استمرى فالناس تعرف ظروفى . .
- ولكنهم يريدون أن يخففوا عنك . إنهم جميعا يحبونك .
- أعرف . ولكن اعتذرى . .
- لقد مضى عام ونحن نعتذر لكل الناس . . بينما سيادتك تذهيب لبعض الحفلات والناس يتساءلون عن سبب القبول والرفض . . ولا بد أن نفسر لهم ذلك .
- اختارى تفسيراً معقولاً . . اعتذرى .
- وتخرج السكرتيرة .
- ودقات على الباب الخارجى . . وتدخل فتاة رشيقة حلوة . وتقبل السيدة لطيفة . . ويظهر الابتهاج على وجه السيدة لطيفة .
- الفتاة : ازيك ياماما النهارده .
- الحمد لله يازيزى . . كنت فين امبارح ؟
- فى المنصورة . . خالتى كانت مريضة . وحاولت تتصل بك ولم تجدك .
- أخذت الأولاد . .
- كانوا مع شوقى جوزى . . وكلنا نمنا فى بيتنا هناك . . وسألونى عنك فقلت إنك بعافية . . وكلهم « قلقانين » عليك ياماما . .
- وعاوزين يفرفشوك . . كلهم . .
- وتمد يدها إلى بعض الأوراق على المكتب وتقول لها : ردى على هذه

- الرسائل كأن الأم لا تريد أن تستمر في مثل هذا الحوار . .
- تقدرى تيجى تتغدى معنا النهارده . . الأولاد يشوفوكى . .
- مش النهارده . .
- كل يوم تقولى لى مش النهارده ؟
- وإذا وجدت مشكلة اطلبينى فى البيت بعد ساعتين .
- حاضر ياماما .
- وتخرج . .
- ويدخل السائق . .
- وتظهر عليها ملامح الضيق وتقول : فيه إيه يا أسطى سـ
- الأولاد يهانم .
- كفاية أولاد يا أخى . .
- ربنا عاوز كده يهانم .
- ربنا ؟ وإلا الفقر اللى عاوز كده . . فيه إيه .
- محتاج لإجازة علشان الأولاد حيدخلوا المستشفى .
- كل الأولاد ؟!
- قصدى الست . .
- ولادة جديدة . . سابع ولد ؟
- إرادة ربنا يهانم . .
- ... -

صوت من خارج المكتب يقول : طبعا مشغولة ومش حتقدرى
تقابلى الدكتور بتاعك .. طبعا .. لكن أنا اللي حادخل ..
ويدخل ...

وتراه يضحك وتنهض واقفة ..

والدكتور رجل لطيف متقدم فى السن .. ولكنه كثير الحويوة ..
يقول لها : ما شاء الله .. وشك ولا وش القمر . أنت القمر .
اللهم صلى عليك يابنى .. من أين لك هذه الصحة هل تتعاملين
مع دكتور غيرى .. أزيك ؟

- الحمد لله .. اتفضل يادكتور جعفر .. أنت عارف أنا لما
أشوفك يروح منى المرض ..

د. جعفر : فينك يامراتى تسمى الكلام الحلوه .. أنت
عارفه مراتى أول ما تشوفنى تقول لى إيه : تقول .. هه .. حتنام ولا
حتسهر الليلة .. ولا الى ننام فيه نقوم فيه .. طبعا عندما أسمع
هذا الموشح أقول لها حنام طبعا .. مين مغفل يخرج مع واحدة تبدأ
الحوار بهذه الصورة التى تبعث على اليأس والقرف .. سمعيني تانى
ياستى الأغنية الى قلتها دلوقت .

- أنت تعرف أن أم كلثوم كانت تقول : ولما أشوفك يروح منى
الكلام وانساه عارف ليه يادكتور .. لأنك أنت ما بتبطلش كلام ..
لأنك بتتكلم بالنيابة عنى ويمكن عن الإنسانية كلها ! هاها ..
هاها .

- قولى لى ياجميلة أخذت الأدوية طبعا . . ونمت كويس
امبارح . . طبعا . . وحتيجى تتغذى أو تتعشى عندنا أمتى .
تنشغل فى مكالمة تليفونية . . ويتتهز هو هذه الفرصة ويخرج وهو
يشير إلى أنها مثل زوجها تماماً تعمل ليلاً ونهاراً !

* * *

ويدخل أبو الفتوح الزهيرى أخوها . . ويتقدم بسرعة إليها ويمد
يده . . وتمد يدها ويقبل يدها . . ثم رأسها . . ويقف فى احترام
شديد وتقول له :

اقعد يا أبو الفتوح . . أخبار مراتك دولت إيه .

- أحسن دلوقت يا أختى ربنا يخليك لنا ويعطيك الصحة
والعافية . .

- متى تخرج من المستشفى ؟ .

- كمان أسبوع . .

- سلم لى عليها . .

- ربنا يخليك . . وهيه كمان تبوس إيديك . .

- عاوز فلوس .

- أنا ؟ أعوذ بالله . . وهوه أنت خلّيت حد محتاج لحاجة . . ربنا
يبارك فيك . . ألف شكر يا أختى . . ألف شكر . . بالإذن
ياأختى . .

ويتقدم إليها ويقبل يدها ورأسها . .

ترفع لطيفة التليفون وتتحدث إلى ابنتها زيزى وتقول لها :

خالك كان عندي . . آه . . لا يشيع يا ابنتي حاعمل إيه . .
أدى له مفيش مانع . . أدى له . . العفو . . والله مش قادرة
يازيزى . . بكرة نتكلم فى مكان الغدا أو العشا بوسى لى الأولاد . .
تعود السكرتيرة .

وتسألها السيدة لطيفة : فيه إيه ياكاميليا . .

- برقيات عاجلة . .

- حسان مارجعش .

- حسان ابن سيادتك . . لسه مارجعش . . اتصل من

الإسكندرية وقال إنه حيوصل قبل سيادتك ماتسيبى المكتب . .

- امتى اتكلم .

- كلمنى من العربية . . وسألنى على سيادتك لأنه وجد التليفون

« مشغول » .

- امتى ؟

- من دقائق .

- خللى الأوراق لحد الدكتور حسان ما يشوفها . . وإذا كان فيها

حاجة حيتصل بى . . فيه حاجة مهمة . .

- دعوات جديدة .

- اعتذرى . .

- سيادتك كنت وعدت الأسطى عبد العال إنك حتحضرى كتب
كتاب بنته اللى بتشتغل عندنا فى العاشر من رمضان . .

- إيوه صحيح . . مفيش مانع . . إيه الهدية المناسبة فى الحالات
اللى زى دى . .

- فلوس فى ظرف . .

- قد إيه ياكاميليا . .

- زى سيادتك ماتشوفى يا أفندم . .

- قد إيه يعنى ؟

- مرتب شهر . .

- شهر ؟ بس ؟ وأنا اهز طولى لحد آخر إمبابه علشان مائة جنيه
ولا مائتين . . طيب متشكرة ياكاميليا . . إذا كان فيه حاجة هامة
جدًا اتصلى بى .

تخرج السكرتيرة . .

وعلى السلم تقابل ابنها الدكتور حسان الذى يقبل خديها
ورأسها . . وكلمة منه وكلمة منها . . وتدخل سيارتها ويظل واقفًا
حتى تحتفى ويصعد إلى مكتبه . .



الموظفون في الصباح الباكر يشربون القهوة . . والسندوتش يخفونه
في الأدراج . . ويدور حوار .

- إن شاء الله حتقولك لا . .

- لا إجازات . . لا زواج . . لا سلفيات . . لا تدخين . . لا
سندوتشات .

- نفسى أسمع منها لا واحدة . . واحدة ولا تكثر على الله . .
لا . . واحدة ياست . . ربنا يسترها معاك . . (لأ) واحدة .

- (لأ) واحدة لإيه .

- للجواز . . ياسلام لو قالتها الست في جواب مكتوب على
الماكينة بوضوح . .

- علشان إيه .

- علشان أديه لعنايات اللى راكبها عفريت عاوزه تتجوز بأسرع ما

يمكن . . لا عندي شقة ولا عندي فلوس للعفش ولا عندي للشبكة . . ولكنها مصدقة أغنية صباح اللى بتقول : جنبه ونأكل بطاطه . . (لأ) واحدة . . وأنت مش عاوز (لأ) .
- عاوز . .

- (لأ) لإيه ؟

- لا . . لا نذهب إلى الإسكندرية . .

خربت بيتى السنة اللى فاتت . . عاوزها تقول إن عندنا
إضافى « . . لا إجازة !

- وحياتك حتقول السنة دى : إيوه لكل شىء . . زهقة
قولة لا زهقت . . وهى واجعة دماغها مع الناس ليه . .
يتجوز وبتنيل على عينه وعين اللى خلفوه واللى حيخلفهم . .
إيه رأيك أنا سمعتها بتقول للأستاذ أبو المعاطى مفيش مانع -
إجازة وريح أعصابك . . وسمعتها بتقول لسهير بتاعت التليز
خدى إجازة واتجوزى . .

- بتكلم جد ؟

- إيوه والله .

- يانهار اسود ومنيل . . دا حنا اتخرب بيتنا . . والحل ؟

- والحل عندها .

- لا . . عند الدكتور حسان ابنها العزيز . . هى تقول

وهو يقول : إيوه .

- واحد يشد وواحد يرخى . .

- أبدأ الاثنين خلف خلف .

- لكن كلمة مين اللي تمشى .

- هي طبعا .

- وهو كان . .

- أبدأ . .

- اسمع كلامى . .

- أنا أسمع كلامك تانى . . لا يا حبيبي أنا فى الحاجات دى أروح

بنفسى واسأل وأغامر وزى ماتيجى تيجى . . وأنا حابدأ من دلوقت

ويخرج . .

* * *

يدخل مكتب د . حسان وينحنى على يديه بالتحية . ود . حسان

يسحب يده بسرعة . .

ويقول له : عاوز إيه .

- سيادتك عارف .

- موافق .

- بس سيادتك مش عارف أنا عاوز إيه . .

- اللي أنت عاوزه أنا موافق عليه . .

- ولكن الهانم ممكن ترفض .

- تبقى تروح لها . . أما من ناحيتى أنا موافق . .

- يبقى عملنا إيه ياسعادة البيه .

- عملنا الأصول . . أنا مدير وهى رئيسة مجلس الإدارة . .
- ولكن سيادتك .
- إيوه سيادتي وافق كثيرا وهى اعترضت . . والكلمة كلمتها .
- إمال أنا جيت لسيادتك ليه ؟
- بتسألنى ؟ اسأل نفسك !
- ولكن ياسعادة البيه المرة اللى فاتت .
- مرة وفاتت . . نعم إيه تانى .
- ولا حاجة . شكرا ياسعادة البيه .
- ... -
- يذهب د . حسان إلى والدته السيدة لطيفة . ينحن على يدها
- يقبلها ويقبل رأسها . ويجلس .
- عاوز أكلمك فى موضوع ياماما . .
- أنا هنا رئيسة مجلس الإدارة .
- آسف . . عاوز أكلم سيادتك فى موضوع . . الحقيقة أكثر من
- موضوع ولا بد أن نتخذ فيها قرارا حاسما . . شوفى ياماما . .
- (تستاء لكلمة ماما) . .
- عاوز أكلم حضرتك فى موضوع شخصى . .
- خاص بك .
- خاص بحضرتك . .

- وتكلمنى فى موضوع خاص بى ليه ؟

- لأنه خاص بنا أيضًا .

- إيه ؟

- كفاية ملابس الحداد دى . . الحزن فى القلب . . ولكن تغيير اللون الأسود يمكن يغير معنوياتك . . فالناس هنا يلاحظون أنك عصبية جدًا . . وحزينة ولذلك يتردد الكثيرون فى عرض بعض الموضوعات الهامة لأنهم « خايفين » يضايقوك أكثر . .

- إيه تانى .

- لازم تقبلى بعض الدعوات . . غداء . . عشاء . . زفاف . . أعياد ميلاد . . لازم تغيرى . . ولازم حد ينام معاك فى البيت . . خادمة وأنا لقيت لك خادمة من المنصورة . . هى طرف قرابة تعيش معاك وتقضى كل حاجاتك . . بدلا من الوحده الفظيعة . . إنت عارفه أننا كلنا بنحبك وقلقناين عليك . . ولولا أننا مش عايزين ندوشك كنت طلبت أننا نسكن معاك . . لكن الأولاد والكلاب والدوشة . .

- وإيه تانى يادكتور ؟

- إنت لسه زعلانة من أختى . . أختى فيها شبه كثير من حضرتك . . عندها اعتزاز بنفسها . . وأى شىء وأى أحد يقرب من زوجها تعتبره إهانة لها . .

- وإيه اللى حصل ؟

- حضرتك أهنت زوجها . .

- أنا ما أعرفش أنه زوجها . . أنا أعرف أنه موظف هنا . .
وموظف غلطان . ولا بد من محاسبته . . وهى لا شأن لها بأخطاء
زوجها . . وهو كمان لا شأن له بأخطاء مراته . . كل اللى هنا
«موظفين» . . وأنت وهى وهو يجب أن يكونوا قدوة وإذا نظر لى على
أنى حماته وهى على أنى أمها وأنت على أنى أمك تنهدم المؤسسة
كلها . . أبوك أقامها بالتعب والمرض لحد ما مات . . وأنا مش عاوزه
أهدم اللى بناه . . فاهم يادكتور . ومرة ثانية ما تكلمنيش فى
موضوعات خاصة هنا . .

- مش خاصة سيادتك . .

- طبعًا خاصة . . هل لو كان جوز أختك موظفًا آخر كنت
اتكلمت عنه هل لو لم تكن هى أختك كنت اتكلمت هنا . .
- آسف حضرتك . .

- أنت كلمتنى عن أختك وعن زوجها . . وما كلمتنيش عن إيه
اللى انت عملته فى الإسكندرية . . إيه اللى انت عملته ده ؟

- الله . . بسرعة قالوا لك . .

- قالوا بعد ما خرجت من الاجتماع .

- مين قال لسيادتك ؟

- قالوا لى . . غلطان ولا لآ ؟

- أنا غلطان .

- واعتذرت لوكيل الشركة الألمانية .

- اعتذرت .

- إذن تعال أنت وهو وثلاثة من وكلاء الشركات الثانية على غدا
أو عشاء وقدم له هدية ذهبية من الصناعات المصرية . . أو نسخة
من تمثال ذهب لنفرتيتي تقدمه لزوجته . . لا تنس أنهم يشترون منا
بها يعادل أربعة ملايين دولار كل سنة . . لا تنس .

- حاضر . .

.....

يسمع صوت الدكتور : . . يانهار القشطة . . ياقشطة . .

ويدخل مكتب السيدة لطيفة ويقول لها : اللهم صلي على كامل
النور . . زى القمر بالطيفة هانم النهارده . .

- قمر كام فى الشهر .

- ١٤ والله العظيم . .

- يعنى مش أقل ومش أكثر . .

- أبدا . . عاوز اطمئن على حاجة واحدة عندك . . أنت قلت لى
فى التليفون امبارح إنك دخت ووقعت على الأرض . . أنا عاوزك
تفتكرى كويس جدًا ركزى معايا . . هل أنت تعثرت فى السجادة
ووقعت وبعدين انزعجت . . والا أنت دخت وبسبب الدوخة
وقعت على الأرض . . وإذا كنت دخت . . هل قمت مرة واحدة
والا دخت وأنت قاعدة . . وهل دخت مرة واحدة . . ولا دخت

بالتدريج ثم دخت ووقعت على الأرض .. واستمرت الدوخة كم
ثانية .. ركزى معايا .. ركزى ..

- مش فايقية دلوقت ..

- لا .. لا .. لازم تفوقى يا جميلة .. فوقى معايا .. بلاش
تفوقى .. إذن لابد من عمل تحاليل .. أبعت لك المساعدة بتاعتى
تاخذ شوية دم .. لا خوف .. إن شاء الله خير .. سلام عليكم
يا قمر ..

....

* * *



الأسرة تلتف حول السيدة لطيفة . . ابنتها وقد ارتدت فستاناً
جميلاً وأختها وقد ارتدت ملابس الإحرام فقد عادت لتوها من
السعودية . .

أما ابنتها فهي عادة تحدثها في موضوع واحد تؤكد دائماً أن صحتها
كويسة وأن معنوياتها في السماء ولكن السيدة لطيفة تقول لها : لا
تحاولي . . فأنا أمام الناس أبدو كالحصان . . ولكن بعيداً عن الناس
فأنا صرصار أزحف على الحائط . . وإذا شديت حيلي شوية فأنا فأر
أقفز من ركن إلى ركن . . وإذا حاولت أن أكون إنسانة فإنني أقف
أمام المرآه ودمعتي على خدي . .

- يا ماما حرام عليك . . أنت مش أكبر من طانط ألفت . . وأنا
أكبر من طانط عصمت . . والزعل لا يودي ولا يجيب . . والأعمار
بيد الله وهذا قدر كل إنسان أن يموت . . والحى أبقى من الميت . .
والزواج مش حرام !

- بلاش .. بلاش .. أرجوك ..

- بلاش إيه يا ماما .. هوه أنا كل ما اتكلم تسدينى كده
ياماما .. افرضى يا ماما إن زواجك مشروع سوف يعود على الشركة
بمئات الألوف .. وأكثر من مئات الألوف أنت اليوم اللى بتغيبى فيه
عن الشركة كل شىء بيتعطل .. المرة اللى فاتت لما أنت كنت
عيانه .. شوفى أحنا خسرنا يمكن ثلاث أرباع المليون .. واحنا ما
رضيناش نقول لك ..

- ده حصل ؟ !

- إيوه حصل .

- إزاي يعنى ؟

- بسلامته مدير الإدارة عمل هوه كمان عيان .. ولما اتصلوا بنا من
فرنسا لاستعمال الشحن مالاقوش حد .. أنا كلمونى .. وأنا ما
أقدرش أدى أمر .. وأخويا كان فى الأرجنتين وأنت عيانة ..
حكايات وحكايات ..

- يعنى إيه ؟

- يعنى لما أنت تكونى كويسه صحتك وأعصابك .. الدنيا كلها
حتمبقى كويسه .. صدقيني ياماما .. ده مش رأبى لوحدى ..

- بس .. كفاية .. أرجوك خلىنا فى الشغل ..

- ده صميم الشغل ..

....

- على كل حال أنا في مكتبي إذا احتجت لأى شىء !
لطيفة في مكتبها . وأمامها جلست اختها التى لم تتكلم أثناء
حديث لطيفة وابنتها زيزى . .

أختها أميرة : كلام بسلامتها زينب مضبوط يالطيفه يا أختى . .
أنا مارضيتش أتكلم علشان أنا عاوزاك تسمعى كلام زينب للآخر .
- أنتم « متفقين » ؟

- إيوه ده رأينا كلنا . . اسمعى ياأختى أنا جايه أعرض عليك
حاجة . . بس ما تفهمينش غلط . . وإذا ماعجبكيش كلامى
اعتبرينى لا جيت هنا ولا شفتك . .
- إيه ؟

- دلوقت أنت عارفه شوشو قد إيه بتحبك .
- وأنا بأحبها . .

- طيب . إيه رأيك أن شوشو تيجى تغيث معاك . . ترد على
التليفون . . تقابل ضيوفك . . تسليك . . وانت عارفه شوشو زى
النسيم والله والله بتحبك أكثر منى . . وأكثر من « أبوها » . . ودى
رغبتها . .

- تيجى أى وقت .

- لأ مش أى وقت . . لا انت لازم تطليبيها . . انت عارفه البنات
حساسة جدًا ويتهيأ لها إن أحنا علشان بنتخاتق معاها ، إننا أحنا
اللى طلبنا منك تاخديها عندك . .

-وانتو بتتخائنقوا معاها ليه . .

- أنت عارفه علشان وحيدة دلوعة شوية . . أى حد يكلمها تعيط . . ونفضل طول الوقت نتحايل عليها تأكل وتشرب وتذاكر وتروح الجامعة . .

- وأنا مفيش عندى أعصاب ياأميرة . . صحيح باحبها . . لكن ما أقدرش أتحايل . .

- معاك هى اللى حتتحايل عليك تاكلى وتشربى وتفرفشى . . أنت عارفه أن شوشو تحب الحظ والضحك . . والنبي حتخليك سعيدة . . ربنا يسعدك ويسعدها . . قلت إيه بالطيفه ؟
- كلميها فى التليفون . .

وتنهض أميرة وتطلب شوشو فى التليفون : كلميها انت . .
لطيفة فى يدها التليفون : آلو . . ازيك يا شوشو . .

- أهلا . . إيه الفرصة السعيدة . . النهارده إيه فى الشهر . . انت اللى بتطلبينى . . إيه السعادة دى . . إيه النور ده . .
- ازيك يا شوشو . . وحشتينى .
- وانت أكثر . .

- أنا عاوزك يا شوشو تيجى تتغدى معايا . . آلو . . آلو . . انت فين .

- أنا حينغى على من الفرحة .

- يابت يابكاشه . .

- أنا ؟ لا والله .. انت عارفه انت إيه بالنسبة لى ياطانط .. أنت
 موش عاوزة أضيع الوقت فى الكلام ..
 - أنا حابعت لك العربية .. وهاتى ..
 - كل هدومى طبعاً ..
 - (تضحك) وهدوم « أبوك » وأمك ..
 - الله ؟ ! يبقى عملنا إيه ياطانط .. ده أنا عاوزة أبعد عنهم ..
 ياطانط طول النهار والليل فضايح ووجع قلب .
 - بيحبوك ياشوشو .
 - اهو ده الحب والبهدلة .. أنا لوحدى ياطانط ربنا يخليك ..
 قلت إيه يأجمل طانط فى الدنيا كلها ..
 - (تضحك) تعالى وحدك .. ومن غير هدوم ..
 - هيه .. يحيا الاستقلال التام .. وحق تقرير المصير ..

* * *

- الطيب د. جعفر يدخل فى هيصه . وهى لا تكاد تراه حتى
 تبتهج لذلك ..
 د. جعفر : يا صباح الفل والورد والنور والصحة اللى زى
 البمب ..
 لطيفة : أما لو كان الواحد زى ما انت بتقول ، ما يبقاش فى الدنيا
 هموم ولا وجع قلب ..

د. جعفر : كويس الى انت اتكلمت على وجع القلب . . أنا
مش فاهم انت قلبك يوجعك ليه . . العيال . . العيال كبروا
وتجوزوا وخلفوا . . الفلوس ؟ ما شاء الله زى الرز . . الصحة زى
البمب . . هوه بس عندك شوية مخاوف ووساوس ودى وراثها
حضرتك من الست الوالدة والسيد الوالد . . وكل عيلة سيادتك
عليهم عفريت اسمه الخوف . .

- قل لى يادكتور .

- نعم ياست الدكاترة كلها .

- التحليل نتيجته إيه .

- ولا حاجة . .

- يعنى إيه ؟

- غالبا ولا حاجة . . أنت فى حاجة إلى شوية راحة وتغيير
مناظر . . مناظر الناس هنا . . وتغيير الدكتور كمان . . لازم تشوفى
ناس ألطف ودكتور أجمل . . الدكتور الحلو يرد الروح مش يسد
النفس زى . . إنت كنت بعيدة النظر لما رفضت تتجوزينى . .

- والنبى تكلمنى جد مرة واحدة يا جعفر .

- طالعة من بقبك زى العسل بس انت كنت بتقولى لى يا جوجو . .

قولها والنبى . .

- ياراجل ياعجوز اعقل . . ما خلاص . .

- خلاص . . لا والله . أبدا . . لحد ما أموت . . وعلشان أكون

دقيق شوية . . لحد قبل ما يبجى توتو بدقيقة .

- توتومين؟
- الموت يعنى!
- هاها .. هاها ..
- هاها .. هاها ..
- كلها كام يوم وتيجى التحاليل .. إن شاء الله مفيش خوف ..
- إن شاء الله ..
- وعمر ما كان فيه حاجة ..
- إنت اللى بتقول كده ..
- الله وهو فيه حد غيرى قال حاجة ..
- إيوه .
- مين إن شاء الله .
- أنا .. إحساس ..
- إحساسك انت؟
- مفيش فى الطب حاجات زى دى .. ثم إن إحساسك ده
بغزالة .. طالع نازل .. رايح جاى .. ما تقلقيش يالطيفه ..
خليها على الله .
- كل شىء على الله ..



تنظر في المرآة وتتذكر كلام ابنتها وأختها والطبيب .. وتنظر إلى وجهها .. وإلى ملامحها وشعرها .. وتبتسم لنفسها .. وتضع الماكياج وتنظر لنفسها .. ثم تغير ملابسها وتنظر لنفسها وتقف فوق السرير .. وتضع المقعد فوق السرير .. وتكشف الفستان عن ساقها .. وتنظر لها .. وتكشف صدرها .. وكتفها وظهرها .. وتنظر نظرات إغراء .. وتضحك .. ثم تذهب وتغسل وجهها وتغير فستانها وترتدى قميصًا .. وما تزال تنظر إلى ملامحها ..

وتطلب صديقاتها في التلفون .. وتضحك .. وتجلس أمام التلفزيون وتقلب في القنوات .. وتقلب في المجلات .. وفي الخطابات الرسمية .. وتفتح أحد أدراجها وتخرج خطابا من ورق أزرق .. وتقرأ بصوت مرتفع ..

(أنت لن تعرفي من أنا .. ولكن واحدًا قريبًا جدًا منك .. ويراك كل يوم .. ولست موظفًا عندك في الشركة .. ولا أحد سكان

هذه العمارة . . ولكنى أراك كل يوم . . والله العظيم كل يوم وأنت
ذاهبة إلى العمل نصف منتعشة وأراك وقلبي يتمزق على شبابيك
وجمالك وأنت عائدة إلى البيت . . والله إننى أصلى لك وأطلب من
الله الكثير . . وربنا قادر على كل شيء . .

ولا يهم أبداً أن تعرفى من أنا . . اعتبرينى عصفورة واقفة على
شجرة بالقرب من شباكك وربنا ألهمها القدرة على الكلام والكتابة .
وتصبحى على خير . .

عصفورة !

* * *

وتقلب فى الخطاب وتشم رائحته . . وتضع الخطاب فى المظروف
بعناية شديدة . . ثم تضعه فى الدرج . .

* * *

ثم تفتح أحد الأدراج وتخرج وردة جافة . . تشمها . . ثم تضعها
على صدرها . . ثم تقبلها . . وتتردد لحظة فى إلقتها فى السلة . . ثم
تعيدها إلى كيس حريرى . . وتدفعها إلى داخل الدرج . .
التليفون يرن . .

ترفع الساعة : ألو . . أهلا . . ازيك يازينب . . آه . . تعبانة
شوية . . عاوزه أنام . . آخذ حباية واحدة . . لا . . الدكتور قال لى
حباية واحدة متضرش . . وحباية واحدة تدوخنى . . للأسف أنا
ابتلعت الحباية . . وكلها دقائق وحنام . . وأنت من أهله . .

تتفرج على عروض أزياء فى التلفزيون .. وأفلام عن الانزلاق
على الجليد .. ومملكة جمال العالم ..

وأخيراً برنامج عن الرياضة .. والايروبكس .. وتتفرج عليه
بعناية شديدة ..

ثم تهتم بما تقوله المذيعة عن التخسيس بالنسبة للسيدات
الكبيرات فى السن .. وتعرض سيدات فى مثل سنها .. قد نقص
وزنهن عن طريق الرياضة .. وعن هدوء الأعصاب وإنقاص المواد
النشوية والسكرية .. وأهم شىء أن الشاى والقهوة والسجائر تفسد
البشرة ..

* * *

ثم أعادت هذا البرنامج مرة بعد مرة .

وراحت تؤدى نفس الحركات التى تراها فى التلفزيون .

التليفون .. إنه د . جعفر : آلو .. أهلا يادكتور .. أبدا أنا
كنت أقوم بركبة فى الشقة .. لا . حاجات بسيطة .. لأ مفيش
حاجة .. لا مش دايمجة .. ولا عندى صداع .. ولا شربت
قهوة .. إيوه .. حتىجى تعيشى معايا .. هاها .. والله دى فكرة
أختى .. الضحك ده نصف العلاج .. ياسلام .. العلاج سهل
كده ؟ !

ثم تخرج المايوهات التى كانت ترتديها .. وتتفرج عليها ..
وصورها مع زوجها على الشاطئ ..

ويدق جرس الباب . .

بسرعة تعيد الملابس إلى مكانها . . وتنكش شعرها . . وتنظر إلى المرآة وتمسح وجهها . . وتنظر إلى الساعة وتنزع قليلاً . . ثم تتجه إلى الباب . . وتتردد . . وتضغط على الجرس . . وتتذكر أن اليوم إجازة الخادمة . .

ثم تقرب من الباب وتسال : مين ؟

وتسمع إلى دقات موسيقية على الباب . . وتعالى الدقات . . وتبتسم لطيفة . . إنها شوشو . . ودون أن تسأل فإنها تفتح الباب . . وتظهر شوشو التى تففز إلى عنق خالتها وتقبلها وتحتضنها . ومعها فتاة أخرى . .

وتقول لها شوشو : دى صاحبتى ومهمتها أن ترقص لك . . ومهمتى أنا ألم النقوط . . أقدم لك شوشو وفرقتها الراقصة والغنائية . . لإحياء الأفراح والليالى الملاح . . بأقول لك ياطانط . . صاحبتى دى بعد سنة واحدة فقط سوف تكون طيبة أمراض نساء وولادة . . وسوف ترتكب كوارث وسوف أتولى الدفاع عنها . . هى طيبة محترمة وأنا محامية بكاشة . . ما رأيك ياطانط فى الدويتو .
لطيفة تضحك من قلبها . .

شوشو : أقدم لك دكتورة كوكو . . اسمها كريمة ويمكن أن نسميها مؤقتا كوكو لحد ما يبجى ابن الحلال الذى سوف يغير اسمها إلى كرم . . كوكو عاوزه تكشف عليك ياطانط . . على قلبك . . علشان تعرف درجة احتمالك للضحك . . هل قلبك يحتمل الابتسام

ولا الكركرة . والا ضحك الحشاشين . . كله موجود ياطانط و ٢٤
ساعة !

لطيفة تضحك من قلبها . .

- ياطانط عندك أكل .

- عندك في المطبخ . .

- يعنى احنا اللى حنطبخ .

- لا . . مطبوخ جاهز . .

- إيه ياطانط . .

- أنا عارفه . . إذا كنت تعرفى تطبخى أطبخى . .

- أنا أحب الحرية . . نطبخ نغسل . . نكنس . . نغنى . .

نرقص .

- قولى لى ياطانط . . حضرتك كنت خارجة .

- لاليه .

- الروح الجميل على وجنتيك وشفتيك . . والا لون الفرحة

والسعادة بينا . .

- (تضحك) .

- أنا لابد سوف أغير لك الماكياج والتسريحة . . احنا حنعمل ثورة

فى البيت . . إن شاء الله . . بإذن الله لن أرجع إلى بيتى إلا إذا تركتك

فى أحضان عريس ما حصلش . . واحد لك وواحد لى . . وواحد

- للدكتورة . . ده برنامج الخمس شهور . . برنامج ال ١٥٠ « يوم » . .
- (تضحك) أنتم « مستعجلين » قوى .
- إحنا كده . . مفيش وقت ياطانط . .



ناظر الزراعة وبعض الفلاحين في فيلا لطيفة هانم . يظهر عليها بعض الاستياء من ملابس الفلاحين وأسلوبهم في الشرب والتدخين والحديث بصوت مرتفع .

ناظر الزراعة : ألف سلامة لك ياهانم .

- وهل قال لك أحد إننى مريضة ؟

- أبداً . . الإنسان في حاجة إلى السلامة دائماً . . .

أحد الفلاحين : قالوا لنا إن الست الهانم بتاكل مسلوق على طول . . أرز . . بطاطس . . وفجل وبصل أى والله . .

الناظر : أنت بتقول إيه ياراجل يامجنون أنت . . الهانم قدامك زى الفل وأحسن من الفل والورد والياسمين . .

فلاحة : طيب والنبى أنت أجدع من أحسن عروسة . . وربنا يعدها لك ياهانم لطيفة .

- (تضايقت) إليه اللي أنتم جاينين تقولوه ده .. بس مش عاوزة كلام ..

الناظر : إيوه .. بس والله ياهانم أنا جبت كل حاجة .. فراخ ووز وبط وسمك وخروف .. والله ياهانم الواحد مش عارف أهل البندر بياكلوا إيه .. جنابك تختارى اللي يعجبك والباقي نرجع بيه .. ما هو سعادة البيه ربنا يرحمه ويسكنه الجنة كان بياكل كل حاجة .. كان بيحى العزبة كان يطلب الفطير والأبرمة والفراخ والسمك المشوى والعسل الأبيض والأسود .. كانت نفسه حلوة ربنا يرحمه ..

لطيفة (تضايقت) : هو الله يرحمه كان بياكل كل ده .. والا كان بيطلبه علشان يسييه للناس الغلابه ياكلوه .. ياراجل يامفتري!

الناظر : تمام كلامك ياست هانم ..

لطيفة : ما هو لو كانت الحاجات دى هدية من عندك كنت جبت عينات منها .. ولكن لأنك حتأخذ ثمنها وتنهب بتجيب الحاجات دى كلها ..

الناظر : والله ومالك على يمين .. كل ده من خيرك ولن آخذ عنها «مليم واحد» .. على الطلاق من هنية .

لطيفة : مين هنية .

الناظر : العروسة الجديدة ..

لطيفة : عروسة .

الناظر : اجوزتها من أسبوع .
 لطيفة : وتحلف الطلاق عليها .
 الناظر : فداك ياهانم . . تروح وأجوز أحسن منها . .
 واحدة فلاحه : الفرحة الكبيرة فرحتك أنت ياهانم . .
 لطيفة : إيه اللي بتقوليه دى ياناعسة .
 ناعسة : قالوا إن الهانم حتنجوز الدكتور جعفر . .
 لطيفة (تضحك) جعفر ؟ جعفر فى سن والدى . .
 ناعسة : وماله . . عقل وقيمة . . امال حتنجوزى واحد فى سن
 أولادك . . كده جواز العقل . . والله أحسن حاجة ياست هانم . .
 (تدخل ابنتها . .)
 تصافح الموجودين وتجلس . .
 لطيفة : أهلا . . ازيك يا حبيبتى . .
 ابنتها : الله . . إنت نسيت والا إيه .
 لطيفة : نسيت إيه ؟
 ابنتها : إحنا اتفقنا أننا نروح الغردقة النهارده . . الله أنت نسيت
 ياماما . .
 لطيفة : نسيت خالص .
 ابنتها : تليفونك كان « مشغول » إمبارح طول الوقت . .
 لطيفة : يمكن ده اللي خلانى نسيت خالص . .
 ابنتها : خير إن شاء الله .

لطيفة : بنت خالك .

ابنتها : أمانى ؟

لطيفة : سلوى .

ابنتها : سلوى . . كلمتك من أمريكا . . اتطلقت ؟

لطيفة : طلاق إيه يا شيخة . . لأ . .

ابنتها : إمال إيه ياماما ؟

لطيفة : بأحاول إقناعها ترجع لمصر هي وزوجها ليعملا معا في إدارة مشروع العجول والدواجن في مدينة السادات . . هي متمسكة بالبقاء في أمريكا . . وزوجها يريد أن يعود . . والله حاجة تضحك . . خلفوا ولدين . . وعلشان كده هيه مش هاعمها ترجع مصر وزوجها عاوزها تخلف . .

ابنتها : يعنى إيه ؟

لطيفة : يعنى إنه عاوز تجيب بنت . . فإذا جابت بنت يبقى مش حتقدر تعيش في أمريكا . . يدوب البنت تبقى عمرها خمس أو ست سنوات ولا تطيق الحياة في أمريكا . . وأنت عارفة بنت خالتك محافظة ومتدينة ومش حيعجبها مشى البنات هناك .

ابنتها : وبعدين ؟

لطيفة : الحكاية محتاجة لزقة بسيطة . . حاولي معاها . .

ابنتها : ياماما إنت مش كنت اتفقت مع د . أمينة . .

لطيفة : أمينة مين ؟ آه لأ . . دى ماتنفعش . . إنت عارفة أنها

بنت أخت د . جعفر وإذا أنا شغلته الناس حيقولوا . . شغلوها
علشان قرية الرجل اللي حيتجوزنى .
ابنتها : حيجوزك ؟ مين قال كده ؟
لطيفة : (تشير إلى الفلاحة) اسألها . . اسألها . .
ابنتها : أول مرة أسمع الحكاية دى . .
لطيفة : فى الريف سمعوها قبلك . . وفى الريف بيسمعوا كثير
قوى . . وبيشوفوا قليل قوى . . (تضحك) .
ابنتها : ولكنها ممتازة ياماما وأنا كلمتها . . وإنت اللي قلت لى
أكلمها . .
لطيفة : نشغلها مع بنت خالك .
ابنتها : مستحيل ياماما . . إنت عارفة اللي بينهم .
لطيفة : إيه اللي بينهم . .
ابنتها : حضرتك نسيت ياماما إن كل واحدة منهم كانت عاوزه
تجوز أخويا . . إنت ناسية والا إيه . .
لطيفة : خلاص بلاش الاثنين بلاش . . كفاية قراب فى الشركة
بتاعتنا . . كفاية . .
(تدخل وتترك الجميع ينظرون بعضهم إلى بعض) .



ناظر الزراعة متأنق في ملابسه وقد جاء إلى الفيلا دون أن يخطر
بذلك . . أبدت دهشتها من وجوده في البيت . .

لطيفة : إيه المفاجأة دى ما حدش قال لى إنك هنا . . (تنادى
على الخدامة والسفرجية وتساءل كيف إن أحدا منهم لم يخبرها
بوجوده) . .

السفرجى : والله يا أفندم هوه اللي قال إن الهانم مش عاوزة حد
يعرف إنه جاء هنا . . وإنك يا أفندم اللي أمرت بكده . .
لطيفة : أنا أمرت بكده ؟

الناظر : آهى كذبه بيضاء يهانم . . أنا كنت عاوز أعملها
مفاجأة لجنابك . . الحمد لله على السلامة . .

لطيفة : (تصرخ فى السفرجى) وأنتم من إمتى بتمشوا كلام أى
حد علىّ . . حسابك بعدين يانور . . اخرج ! فيه إيه يا حضرة
الناظر . . إيه اللي جايبك هنا . . وليه ماجتش المكتب . .

الناظر : ساعيني ياأفندم .. أصله موضوع عاوز الكلام يكون هنا .. ومش فى المكتب ..

لطيفة : يعنى إيه ؟ فيه إيه ؟ الناظر (مرتبًا) المأذون كان حبيجى ويأى .. وبعدين هوه فى آخر لحظة غير رأيه .. وقال إنى لازم أتكلم فى الموضوع لوحدى .. لأن دى مسائل شخصية ..

لطيفة : يعنى إيه ياحضرة الناظر فيه إيه ..

الناظر : ما هو وجنابك عصبية كده مش حاعرف أتكلم خالص .. الحكاية ياهانم .

لطيفة : فيه إيه ؟

الناظر : صبرك على ياهانم .. أنا أتلخبطت خالص ..

لطيفة : إيه الحكاية .. فيه إيه .. مش عارف تتكلم دلوقتى .. تعال بكره فى المكتب .. فكر على مهلك .

الناظر : فكرت ياهانم ..

لطيفة : وبعدين ؟

الناظر : جنابك عارفة أننى اتجوزت خمس مرات ومفيش ولا واحدة نجحت .. وخلفت عشرة أولاد زى قلتهم .. وربنا ساترها معايا .. عشرين « فدان » وفلوس والحمد لله .. والصحة زى البمب ..

لطيفة : يعنى إيه ؟

الناظر : يعنى . . والله ما أنا عارف أتكلم . .

لطيفة : قم يا حضرة الناظر . . عيب الكلام اللى بتقوله ده . .
قم . . اختشى . .

الناظر : وهو الكلام فى الحلال حرام . .

لطيفة : قم بلاش كلام فارغ !

(وتدخل وتتركه لينصرف على مهله . . ويقترّب منه السفرجى
ويفتح له الباب وهو يقول له : يخص عليك راجل كذاب راجل
ناقص . . (ويرزع الباب وراءه) .

* * *

فى سريرها وتسترجع الأحداث الفظيعة التى وقعت فى حياتها . .
كل هذه الأحداث تراها على شاشة التليفزيون وترى كيف أنها
أدخلت المستشفى وكانت مريضة . . وكان فى حادث إجهاض وترى
زوجها إلى جوارها وكذلك أولادها . . والموظفون والورد من حولها . .
وهى تبكى بمنتهى المرارة .

* * *

ومرة أخرى فى المستشفى وكان المريض هو الزوج . . وهى جالسة
إلى جواره ويطلب منها ورقة وقلما لكى يكتب لها ثروته . . وهى
ترفض . .

ويقول الزوج : نحن فى زمن .

لطيفة : زمن كويس . . الزمن اللى أنت فيه طيب وأمير والناس
كلها بتحبك . زمن كويس . . زمن أنت تتصدق على الناس
زمن يحبك الناس . . ده زمن كويس جدًا .

هو : اسمعى كلامى بالطيفة . . إنت لسه صغيرة .

لطيفة : الله يجبر بخاطرك دايبا تقولى إننى صغيرة . . مع أن
الفارق اللى بينك وبينى هو عشر سنوات .

هو : سبع سنوات .

هو : بالطيفة ما حدش يضمن الزمن ده . . لا أبوه ولا أخوه ولا
ولده . . اسمعى كلامى . . أنا مصر . .

هى : وأنا مصرة .

هو : وحياتى عندك . . إن كان لحياتى قيمة عندك .

(تمد يدها إلى الورق والقلم وتبكى . . وهو يكتب . . شيكات
وتوكيلات . .)

* * *

وقد تماثل للشفاء فيقول لها : احلفى إنك مش حتزعلى منى . .
احلفى بالله العظيم .

هى : حلفت . .

هو : لا . . احلفى وقولى والله العظيم .

هى : والله العظيم مش حازعل من أى كلام تقوله . . إلا إذا
قلت إنك عمرك ما حبتنى . .

- إنت عارفه إنى مش حاقول كده . . عمري ما قلتها وعمري ما حاقلها . .

- بصي يالطيفة . . إنت عارفة بأحبك أد إيه . . وعارفة أنى اتمنى لك السعادة . . فى حياتى وبعد ما أموت . . ويمكن بعد ما أموت أكثر . .

- إيه اللى أنت بتقوله . أنا مش عاوزه أسمع ولا كلمة . . والله ولا كلمة . . إيه اللى بتقول يكونش عاوز تقول لى لما تموت أتجوز كمان .
- والله العظيم كنت عاوز أقول لك كده . .
- يخص عليك . .
(وتخفى وجهها فى يديها وتبكى) .

* * *

وتقلب فى أوراق . . وفى جوابات . . جواباته وهداياه . . وتتعب من كل ذلك فتنجه إلى التليفزيون وتتفرج على برنامج للألعاب الرياضية والرشاقة . . مبهورة بصور السيدات اللاتى كن سمانا ثم أصبحن رشقات وتتمنى لو استطاعت ذلك . .

ومن غير شعور تقف على السرير تحاول أن تقلد بنفس الحركات . . ثم تقوم بالألعاب الرياضية على الأرض . . ثم تضع كاست آخر للألعاب الرياضية . .

وكاست ثالث عن الرشاقة والريجيم . .

وكاست رابع عن الموضة . . وخطوط الموضة . .

ومكالمات تليفونية مع صديقاتها عن آخر تسريحة .. والألوان
والإكسسوارات .. والاتفاق مع صديقاتها على الذهاب إلى أحد
الفنادق ومشاهدة عروض الأزياء ..

مفاجأة أن تجد ابنتها وزوجة ابنها .. وإحدى الموظفات بالشركة
وسيدات أكبر منها سنا ..

والكل يندهش من ذهابها ولكنها ترى أد هذا شيء عادى ..
واحدة تقول لها : والله خفت أكلمك .. علشان تيجى
تتفرجى ..

وبعد ذلك تظهر في مناسبات كثيرة ..

والنساء يتهايمن واحدة تقول : أقطع ذراعى من هنا .. إن ما
كان في حياة لطيفة رجل .

واحدة ثانية : أو عاوزه يكون في حياتها رجل ..

- عاوزه .. ألف واحد يتمنى تراب رجلها .. حلوة ذكية ..
عندها فلوس .

- فلوس كثيرة جدًا ..

- والله من حقها تعيش .. أولادها حيتجنوا .

- يعنى إيه .

- يعنى ما أنت عارفه الأولاد .. عاوزين الأب والأم يعيشوا
خدامين لهم طول العمر .. الحياة لهم بس ، والموت لنا احنا ..
قطعوا العيال وقطعت خلفتهم !

تمد يدها في إحدى المناسبات تقطف وردة وتشمها . . ثم بحركة
لا شعورية وضعتها في صدرها . . ابتها تتلفت وتغمز . .
ابنها : إيه الجمال ده ياسيدى . .
لطيفة : أنا ؟ جمالك أنت يا حبيبي . . أنا خلاص !
ابنها : خلاص . . إنت الكمال والجمال ياست الكل . .
لطيفة : مرسى . .
ابنها : والله ياماما الناس يبسالونى . . إيه الى حصل .
لطيفة : فى إيه ؟

ابنها : الشياكة والأناقة والشباب والحيوية . .
لطيفة : يا ولد عيب . . اختشى يا ولد !

* * *

تعود إلى البيت وحدها . . إلى غرفة نومها . . تقلب في
الملابس . . وتختار قميص نوم انيقا جميلا . . وتقف أمام المرآه . .
فوق السرير . . وتتذكر . . ثم تغطي وتنام . .

لطيفة فى عيادة طيبة . . تكشف عليها الطبيبة . . وتقول لها : أنا
من رأيى أنك على مهلك فى الرجيم . . إنت لو مشيت على النظام ده
فى الأكل والشرب . . أنا أضمن لك فى ثلاثة شهور تنقصى عشرة
كيلو . . وعشرة كيلو دى مش حاجة قليلة . . دى كثير جدًا . .
صحيح فيه ناس ممكن تخس عشرة كيلو فى عشرة أيام . . ولكن على
حساب حاجات كثيرة خطيرة جدا على الصحة فى هذه السن . .

يمكن نعطى « أقراص » تنزل المية من الجسم . . فى أسرع وقت . .
ولكن هذا النقص الشديد السريع من الممكن أن يصيب القلب . .
على كل حال . . إحنا مش مستعجلين وإلا أنت مستعجلة بالطيفة
هانم . . العرسان واقفين على الباب . . نقول لهم يستنوا شوية . .
(هاهاهاها) .

لطيفة : (تضحك) عرسان كثير قوى . . هاها . .

* * *

السائق يحكى لزيزى بنت لطيفة هانم . . كيف أنها مرتين فى
الأسبوع تذهب إلى الدكتورة جيهان . .
ابتتها فى حيرة وكذلك زوجها وأخوها أشد حيرة . وكذلك
زوجته . .

ويسألون السائق : إن كانت تبعث به إلى الأجزاخانة وما هى
الأدوية التى تشتريها . . ويسألونه عن الطبيب الخاص بها . . وإن
كان يزورها عندما تتعب . .

السائق يؤكد أن أحدًا لا يزورها فى البيت . . أبدا . فهى التى
تقفل الباب ليلاً . . وهى التى تفتح الباب للخادمة والسفرجى كل
صباح . .

وابتتها تقلب فى دفتر التليفون وتعرف أن د . جيهان طيبة لشئون
التغذية . .

أى انها قد ذهبت لإنقاص وزنها . .

ويسألون السفرجى فيجدون أن الأم انقصت كثيراً من الأطعمة . .
النشويات بصفة خاصة . .

ابنتها : إذن هى عندما تطلب منا أن نعمل لها فتة الكوارع تكون
هذه هى المرة الوحيدة التى تأكل فيها الفتة . . أعصاب قوية . .
وإرادة من حديد !



قلق عام . . الطيب يتصل بها لا يجدها . . وابنتها وابنها ومدير
عام الشركة . .
وفجأة يظهر السائق . ويعرفون منه أن لطيفة هانم سافرت
بالطائرة والسائق لا يعرف إلى أين . .
ويتصلون بفرع الشركة ويعرفون أنها سافرت من يومين إلى
الغردقة . .
وفي الغردقة يقال لهم بأنها سافرت . . ولكنها لم تعد إلى
القاهرة . .
ويعرفون من مكتب الشركة أنها سافرت إلى أسوان ويتصلون
بها . .
لطيفة : وهل أنا طفلة صغيرة كل خطوة لازم استأذن من بابا
وماما . .
ابنتها : لا ياماما . . لكن إنت عادة بتقولى .

لطيفة : معلش ..

ابتتها : قلقنا عليك ياماما .. لكن طبعا اللي يريحك ياماما .
حتى السواق هوه كمان أدى لنفسه أجازة وما قالش لحد أى حاجة ..
لطيفة : إنت مش عارفه إننى كنت بأكتب قصص بوليسية من
زمان .. ولكن « أبوك » الله يرحمه هو اللي خوفنى من نفسى .. وقال
إن قصصى كلها جرائم .. وإنه لا يستبعد أن أقوم فى نص الليل
وأذبحه (هاها .. هاها) .

ابتتها : لكى إيه اللي صحى الموهبة . المخيفة دى .

لطيفة : أبدا .. والله تعبانه ياابتتى .. قلت استريح شوية ..
ابتتها : من حقلك ياماما .. واحنا كلنا نتمنى إنك تستريحى ..
بس قل لنا ياجميل إنت بتعمل إيه لوحدك .. هاها .. هاها ..
الدكتور يطلبها فى أسوان : إيه بالطيفة هانم .. إيه اللي حصل
إنت لقيت لك دكتور أحلى منى ..

لطيفة : طبعا ..

الدكتور : أنا سعيد إنك مبسوفة وأقدر أتخيل شكلك دلوقت ..
طيب الحمد لله .. بينى وبينك البعد عن الدكاترة رحمة .. أنا لسه
ما سألتش عن نتيجة التحاليل .. لكن إن شاء الله حتكون
كويسه .. بتعملى إيه فى أسوان .. بتسلى إزاي .. معاك حد من
صاحباتك .. معاك مين ؟

لطيفة : صاحباتى .. وليه صاحباتى .. هوه أنا ماليش
أصحاب وإلا إيه .

دكتور : ياواد يا جامد إنت . على مهلك علينا شوية بالطيفة
هانم . . الحمد لله إنك مبسوطه . بتعمل إيه . .

لطيفة : اللى بأعمله من كام يوم تتمنى إنت تعمله . . منتهى
الكسل . . أنام بدرى . . وأصحى بدرى . . وأكل فواكه . . مش
حتصدقنى لو قلت لك الصبح فى الشمس . . وعندنا حمام سباحة
جميل . . وطول النهار عصير الفواكه . . والظهر سمك مشوى . .
وبالليل فواكه وشىء غريب . . إنى قررت إنى ما أحطش دوا فى
بقى . . والله ما أخذت دوا . . ولا حبوب ولا أقراص . . قررت
كده . . لا ما تخافشى . . مش حييجرى لى حاجة . . أنا شفت
إمبارح فى التلفزيون الفرنساوى برنامج د . جواشون . . عارفه . . لا
مش قديم . . والله عاجبنى وطلبت من انطوانت تسجله . .
انطوانت زميلتى . . طلبتها فى باريس ولحسن حظى لقيتها . .
بتسلم عليك . . هى كويسه . .

الدكتور : أنا سعيد جدا . . والله كأنك واحدة ثانية . . شىء
عجيب . . إيه اللى حصل . . مش عارف . . لكن أنا رأى أن
المرض إرادة والصحة إرادة . . المريض عاوز يبقى كويس . . أو
المريض عاوز يمرض ويموت . . إنت بالضبط أكبر دليل على
كده . . أنا حاطبلك من حين إلى حين . . وابقى ردى علىّ . . إذا
كان عندك وقت . .

* * *

ترتدى فساتين فى غاية الشياكة . . وأحد المصورين يلتقط لها

صورًا . . منتهى السعادة . . الجرسونات يحبونها ويرحبون بها . .
وتجىء إليها مكالمات تليفونية كثيرة . .

وتتعرف على سيدة لبنانية . . صديقة قديمة . .

وسيدة أخرى في مثل سنها . . كانت جارة لها في الإسكندرية . .
وكل واحدة لها حكاية وقصة وكيف جاءت إلى هنا . . وأسباب
ذلك . . واحدة بعد طلاقها وواحدة بعد وفاة زوجها . . وهجرة
أولادها إلى أمريكا . .

وواحدة لأن الطبيب قال لها : عمرها في الدنيا محدود . . فقررت
أن تعيش الأيام القليلة الباقية . .

وواحدة فوجئت بأن زوجها قد تزوج واحدة شابة صغيرة . . وهذه
الشابة هي طفلة يتيمة كانت هي تقوم بتربيتها . . خادمة صغيرة . .
وكل هذا حدث وهي لا تدري أنه يلتقى بها من وراء ظهرها . .

وتقول لطيفة : كأني انتقلت إلى مستشفى . . إلى مصحة . .
كل واحدة موجهة في قلبها . . وفي مبادئها . . والحل ؟

تقول لواحدة : الدكتور بتاعى بيقول إن الصحة والمرض إرادة . .
يعنى الواحد عاوز يبقى كويس أو عاوز يبقى عيان . . إرادة المريض
نصف الطريق إلى العلاج . . وأنا مؤمنة بكلامه تمامًا . .

* * *

وكان هناك واحد في مثل سنها يرقبها من بعيد . . يتابعها تمامًا . .
وهي لا تلتفت إليه . . وتجلس بعيدًا دائمًا . . ويسأل عنها من بعيد

لبعيد . . وكانت إذا جاءتها مكالمة تليفونية ، فإنه ينظر إليها باهتمام شديد . . ويفتعل أى شىء لكى يكون قريبًا يستمع ماتقول فى التليفون . . ويدور حوار بينه وبين أحد السفرجية .

السفرجى يقول له : لطيفة هانم من أحب الناس . . فعلا لطيفة . . وكريمة وفى غاية الرقة . . كلنا نحبها مع أننا لم نرها هنا قبل ذلك أبدًا . . بعض الزملاء القدامى يقولوا إنهم شافوها من عشرين سنة . . وبسرعة غريبة عرفت أسماءنا كلها . . يمكن علشان عندها شركات ولازم تعرف أسماء الموظفين . . لكى هى سكرة والله ياسعادة البيه . .

وانتهت لطيفة من إحدى مكالماتها وعادت إلى مكانها تحت الشمسية على حمام السباحة .

وبعض الرجال مع زوجاتهم يحيونها . . ويسألون عن صحتها . . وأين كانت بالأمس . . وإن كانت قد نامت مبكرًا . . وسيدات يسألن إن كانت قد شاهدت البرنامج التليفزيونى الفرنسى . . ولا يزال الرجل يتابعها من بعيد . . ويسأل من بعيد . .

ولكنها لم تلاحظ وجوده على الإطلاق . .

تلقى مكالمة تليفونية فى جناحها .

لطيفة : ألو . .

هو : صباح الخير يا لطيفة هانم .

لطيفة : أهلا وسهلا . . مين ؟

هو : آه هو ده السؤال اللي مش عارف حاجاوب عليه إزاي . .
أنا واحد . . معرفة قديمة جدا . . وشفتك من كام يوم . .
لطيفة : من كام يوم . .

هو : ايوه . . لكن مش سهل كده . . أقول أنا فلان الفلانى
شارع الحسينية المنصورة سنة كام . .

لطيفة : وحضرتك موجود هنا . . أهلا وسهلاً . .
هو : فرصة سعيدة . . ولو سمحت لى . . إذا أمكن . . أنا
حاشوفك بعد ساعة ونصف . .

لطيفة : ساعة ونصف ؟ اشمعنى ؟

هو : والله مش عارف لكن أنت عادة « تنزلى » على الحمام فى
الساعة دى . . من سبعة أيام . . بالضبط كده . . ويظهر أن
حياتك منظمة جدًا . . مع إنك ماكتتش كده . . أنا لسه فاكر لما
كانت عربية المدرسة تقف أمام البيت ويزعقوا عليك علشان تنزلى . .
وكثير قوى كان الأتوبيس يسيبك . .

لطيفة : الله . . حضرتك عارف . . ولسه فاكر . . دى حكايات
قديمة جدًا . . وما يصحش الواحد يقول سنة كام . .
هو : والله أبدًا . . أنت لسه شباب . . زى ما كنت زمان . .

لطيفة : ياشيخ بلاش المبالغة .

والله يالطيفة هانم . . كل سن وله جمال خاص وجاذبية . . والمثل
يقول : إن نشفت الوردة ريحتها فيها . . وأنا شايف الوردة ندية . .

لطيفة : شكرا . مين حضرتك ؟

هو : واحد من زمان . . من الماضى البعيد جدًا . . وإن كان
الماضى بالنسبة لواحد زبى وفى ظروفى وفى حالتى مش بعيد . .
الماضى هو الحاضر المتصل . .

لطيفة : ياه . . مين ؟

هو : الماضى متصل عندى أنا . . ولكن يمكن مالوش أى
معنى عندك . . بالاختصار أنا واحد شافك من زمان جدًا . .
وكانت النظرة اللى استقرت فى أعماق قلبى . . على كل حال أنا
حاشوفك بعد نصف ساعة . . موعد نزولك . .

لطيفة : إيوه بالضبط كده . . وحتعرفنى إزاي . .

هو : أعرفك إزاي ؟ ياه . . ده سؤال . . إذا أنا ما عرفتكيش
يبقى أستاهل كل اللى يجرى لى . .
لطيفة : (سعيدة جدًا) .

وقفت لطيفة أمام المرآة وسوت شعرها . . والسعادة واضحة جدًا
على وجهها . . التليفون يدق لا ترد . . تفتح زجاجة برفام جديدة
وتضع على وجهها وفى ملابسها . .

ولأول مرة تدخن سيجارة . . وتخرج فى البلكونة . . وتقف على
السريير لترى نفسها فى المرآة . . منتهى السعادة . .
فى المطعم . . تجلس . . تحاول ألا تلتفت حولها . .

ومن ورائها يظهر رءوف صدقى رجل الأعمال . فى مثل سنها . .

في الستين شديد الأناقة . . يتقدم ناحيتها وفي يده وردة جميلة
ويقدمها لها . .

رعوف : الوردة دى فى إيدى من ثلاثين سنة . . والله يالطيفة
هانم . . أو لكى أكون صادقاً إيدى ممدوة من ٣٠ سنة والوردة هى
التي بتغير لونها ورائحتها ونضارتها ولكن الذي لم يتغير هو أنا . .
لطيفة : (سعيدة جداً) الدنيا دى غريبة . .

هو : غريبة . . الدنيا معقولة . . كل شىء فيها يتغير إلا
الشعور الصادق . . خدى بالك يالطيفة هانم إننى باتكلم عن
نفسى . .

هو : رعوف صدقى شارع الشيخ حسين . . المنصورة .
لطيفة : بلديات كمان .
هو : بيت رقم ٣٧ .

لطيفة : الله . . البيت اللي جنبنا ؟ الدنيا صغيرة جداً . .

هو : وعلشان كده أنا مش محتاج أتكلم عن نفسى . . وإنت
مش محتاجة تقولى لى الكثير عن نفسك . . فأنا أعرف الكثير من ليلة
زفافك فى نادى البلدية . . واللى كانت بتزفك بالأمانة أم زيتون وبتتها
وطنية صح ؟

لطيفة : (تضحك) صح جداً . . أنت ناقص تقول لى اتعشنا
إيه . .

هو : أنا اللي اتعشيت . . لكن إنت أكلت ملبساية واحدة . .

العشا كان من بيت الشناوى وبيت المصرى والخرفان من بيت
المليجى والحلو من بيت نور واللى بخرتك من بيت الباز . .
لطيفة : مضبوط جدًا . . آسفة اتفضل يارءوف بيه . .
رءوف : ياه . . بعد ثلاثين سنة . سمعت اسمى على لسانك . .
ولكن انت ما سمعتيش اسمك اتقال كم مرة على لسانى فى كل
السنين دى . .
الجرسون يقول لطيفة هانم : تليفون من المنصورة يافندم (تذهب
للتليفون) .
يجلس رءوف صدقى وحده . . سعيدًا ومضطربًا . . ويتلفت
حوله . .
وتجىء لطيفه وتستأذن لأنها مكالمة طويلة من الشركة التى تملكها
وتديرها . . وتعذر وتعهده بأن يلتقيا فى العشاء . .



ارتدت لطيفة فستاناً سواريه في غاية الأناقة . .
هو ارتدى ملابس قاتمة وعلق وردة في الجاكتة . .
واضح جدًا سعادتها وحرصها على هذا اللقاء . .
كان في انتظارها . . صافحها وانحنى وقدم لها وردة وأقعدها .
فقال لها : أنا طلبت الطعام . . وأرجو أن تقبلي هذه الدعوة على
العشاء . . فقد تمنيتها طول عمري . .
لطيفة : مرسى . .
هو : أنا طلبت دجاجًا مشويًا . . وكوسة مسلوقة . . وصلطة
بلدى . . وطلبت قلقاسًا بالخضرة . .
هى : أنا أحب كده بالضبط .
هو : كان فيه صعوبة في الحصول على القلقاس ولكن أنا
صممت . . لقد قامت عربية وأتت بالقلقاس من لوكاندة ثانية . .

وطلبت لك طماطم بالليمون .
 هو : ولكن في الأول شمبانيا . .
 هى : غريبة ؟
 هو : شمبانيا كوردون روج .
 هى : يبقى دى المرة الثانية في حياتى الى حاشرب فيها شمبانيا
 كوردون روج . .
 هو : أنا عارف . . المرة الأولى كان يوم احتفالك بالعيد الفضى
 للزواج في فندقن كربون بباريس .
 هى : بالضبط . . إيه ده إنت عارف كل حاجة . . إزاي .
 هو : أنا قلت لك . . إن الماضى عندى مش ماضى . . إنه
 حاضر مستمر . .
 هى : وده اسمه إيه .
 هو : الاسم لا يهم . . ولكنه شعور متدفق . . لم يهدأ لحظة
 واحدة .
 هى : معقول ؟
 هو : عين العقل . .
 (يشربان الشامبانيا . . في غاية السعادة . . الموسيقى هادئة . .)
 هى : الموسيقى دى لها ذكرى عزيزة عندى . .
 هو : تسمحى الرقصة دى . . تنهض . . ويتقدمان للرقص
 والسعادة واضحة . .

ويقول لها كلامًا ويبتسم . . ويبدو عليها الخجل . . والحرج . .
ولكنه ماضٍ في الهمس) .

وتعود إلى مقعدها . .

هو : دلوقتٍ أقدر أموت سعيدًا . . وأنا أيضًا ماتت زوجتي . .
كانت مريضة . . ماتت في العام الماضي . . بعد زواج استمر خمسة
وعشرين عامًا . . أنجبنا ثلاثة أولاد . . واحد يعيش في أمريكا مع
زوجته وواحد يعيش في ألمانيا مع زوجته . . والثالث يعيش في
المنصورة مع زوجته . . وأنا مع ذكرياتي . . وكانت حياتي هادئة . .
حاملة . . حتى رأيتك أخيرًا . .

(وهى سارحة في الذى يقول) .

ولما رأيتك أحسست بزلزال في داخلي . . القلب النائم صحا . .
القلب الذى يدق كالساعة أصبح يدق كالطبل . . وأنا في مثل هذه
السن . . لا أتحمّل هذه الدقات القوية . . تمنيت أن أكون أسبق من
كل اللى تقدموا لك . . ولكن مع الأسف انشغلت بمرض والدتي . .
يرحمها الله . . وبعدها مرض والدى يرحمه الله . . وكان شعورى في
ذلك الوقت فظيعة . . أحسست أن أمى مدت يدها لوالدى . .
ووالدى مد يده لى . . وأننى لاأبد أن أموت . . ولم أكن مريضًا . .
فكأننى أردت أن أعذب نفسى . . أسرفت في الشرب . . وأسرفت في
التدخين . . وتطلعت إلى المستحيل الذى هو أنت . . وزادت
الهموم . . وأعتقد أننى مرضت حتى زارتنى خالتى وهى التى اختارت
لى زوجتى . . وكانت جميلة وطيبة ومخلصة . . يرخمها الله . . وكان ما

كان .. ولم أعرف أن الذى كان فى قلبى لك .. ليس هو الشعور
بالحزن لأننى لم أتزوجك .. ولكن هو الشعور بالحب رغم أننى لم
أتزوجك ..

ويسكت .. وتسكت هى أيضًا .. ويرفع رأسه هامسًا :
لطيفة : تتزوجينى !

لطيفة (فوجئت وظهر عليها الاضطراب) رءوف .. رءوف ..
أرجوك كفاية بقى .. لا تنس أننى مريضة .. وأنا جئت هنا هربا
من نفسى .. هربا من كل الظروف فى القاهرة .. الحمل ثقيل
جدا .. لقد تركنى زوجى .. وأنا غير مستعدة لأى شىء .. أولادى
كبروا .. وهم يساعدوننى فى العمل .. وهم عبء ثقيل .. فأنا
بطبعى عصبية جدًا .. وأحب الكمال فى كل شىء .. ولا يوجد فى
الدنيا كلها شىء كامل .. أو واحد كامل ورغم أننى أعرف هذه
الحقيقة .. لكن أنساها فى اليوم الواحد ألف مرة .. وعلشان كده
طول الوقت أزعق وأتخانى وأرجع البيت ابتلع الأقراص المهدئة ..
وفى الشهور الأخيرة انحدرت صحتى وعرفت الأرق والقلق والصداع
النصفى والتهاب القولون .. والدكاترة بيقولوا الكلى .. وبيقولوا
الكبد .. وكل يوم تحاليل .. وسافرت إلى باريس وإلى لندن ..
وكل يوم أعرض نفسى على دكتور .. وآخر حاجة قالوا عندى نقص
المنجنيز وعلشان كده إيدى ترتعش .. ويمكن حالة نفسية .. وأنا
جيت هنا هربانة .. لم أخبر أحدًا لا أولادى ولا الدكتور .. وحتى
لا يعملوا لى فضيحة وينشروا فى الصحف أننى مفقودة كلمتهم

جميعًا . . ولم أذكر لهم أين أنا . . وإنما أكدت لهم أنني كويسة ومش
عاوذة حد يتصل بى . . فيما عدا اثنين من كبار الموظفين بالشركة . .
وامبارح بس قلت للدكتور . . لأننى عاوذة أعرف نتيجة التحليل
والحقيقة . . أنا مش عاوذة . . إيه رأيك إننى من نهار ما جيت
هنا . . لم أجد عندى رغبة فى تناول المهدئات . . تصور . . يبقى
حالة نفسية . .

رعوف : لو أنت شايفه اللى أنا شايفه .

هى : شايف إيه .

هو : مش حتصدقينى . . لأننى باشوف بعينى أنا . . شايف
واحدة فى غاية الجمال والصحة والعافية . . باشوف بنت صغيرة . .
فاكرها من أيام مدرسة البنات اللى فى حى المختلط . . وأنت كنت
بتمشى من شارع السكة الجديدة . . وتطلع على الكوبرى . .
ومش فاهم ليه كان دايبا القلم يقع منك على الأرض . . وتقعدى
على الأرض وتجيى القلم . .

هى : ياه . . بالضبط كده . . يمكن كانت حيلة بنات عاوذة
تلفت نظر اللى راكب على حصان أبيض . . ينظر من فوق الحصان
وياخذ القلم ويديه لى . . هاها رعوف (يضحك) . . والله ما
كانتش عندى الشجاعة إنى أعمل كده . . يعنى إمبارح واحنا
بنمشى على البحر . . وأنا كمان عندى شركة لكن أنا فكرت السنة
اللى فاتت إننى أصفىها . . أو أبيعها لابنى . . فأنا عندى ما يكفينى
الكام سنة اللى فى حياتى .

هى : تعيش .

هو : تعيشى إنتى بالطيفة ألف سنة .

هى : ألف .. طيب قول اثنين .. ثلاثة .

هو : ربنا يديك طولة العمر .. وتسعدى كل اللى يحبوك ..

هى : اللى يحبونى ..

هو : أنا عارف أن كلهم بيحبوك .. أولادك وأحفادك ..
والموظفين أنا عارف .. أنت كريمة .. ورقيقة فى التعامل معهم
جميعًا .. أما أنا فلا أحد عندى .. أولادى كل واحد فى ناحية ..
البيت واسع .. والوقت طويل .. والليل أطول من النهار عشرين
مرة والأيام بطيئة .. والناس كلامها مختلف .. واهتماماتها
غريبة .. وأنا حاسس أننى غريب بين الناس .. وعلشان كده فأنا
من الممكن أغير الغربة .. وأروح لغربة أحسن فى باريس أو لندن
الى أنا اتعلمت فيها .. وقضيت أجمل سنوات العمر وأنا أدرس
وأتعلم وأحلم بمستقبل .. لى ومستقبل بلدى .. وعاوز أجدد
أحلامى الكام سنة الى فاضلة ..

لطيفة : شىء غريب .. إيه اللى انت بتقوله .. وإيه اللى أنا
باسمعه ..

هو : أنا عارف أننى تأخرت ثلاثين سنة ..

هى : إيوه .. لكن أحببت زوجى ..

هو : أنا عارف .. إحنا كنا اثنين بيحبوك فى نفس الوقت ..

هى : شىء غريب .. لو تعرف كلامك عامل فى إيه .. لو
تعرف يارءوف .. إيه اللى اتناه دلوقت ..
هو : إيه بالطيفة .

هى : باتمنى أن نتائج التحليل تكون سلبية .. وتكون مخاوى فى
غير محلها ..
هو : ليه بالطيفة ..
هى : ليه ؟ آهو كلام .

هو : مش كلام .. ده شىء جميل جدا اللى أنت بتقوليه . هل
أنت عاوزة تقولى إنك تتمنى أن تكونى سليمة صحيحة .. ومش
مريضة لكى تعيش معا فى سعادة حقيقية ..

هى : شىء غريب .. إمبارح بس الدكتور كلمنى من المنصورة
وقال لى : إن التحليل سليمة .. ومفيش عندى أى حاجة .. وإن
شاء الله انت كمان .. أنا متأكد أن معندكيش أى حاجة .. بس
إرهاق .. أرق .. وكل ده يمكن الواحد يقضى عليه بالإجازة ..
بالفسحة بالراحة .. بالبعد عن القاهرة . صدقيني أنا عايش بالقوة
وعيان بالوهم ..

هى : كلامك صحيح يارءوف .. تمام كده ..
هو : إذن باجدد طلبى .. بالطيفة .. وعاوز أسمع ردك ..
هى : مفاجأة كبيرة يارءوف دى ممكن تلخبط حياتى .
هو : تصحيح حياتك وحياتى .. أنا شعورى صادق .

هى : أنا متأكدة .

هو : أشكرك .

هى : وأنا كمان يارءوف وبسرعة غريبة . . كأنى كنت أنتظر حاجة تنشلنى . . وأنا تصورت أن الإجازة والراحة قادران على هذه المعجزة . . ولكن ما كنتش عارفه أنه فيه شىء أهم من كل ده . . شىء شخصى يهمنى . . بمتتهى الصراحة يارءوف وبمتتهى الصدق . . أنا فكرت فى كل حاجة أنت قلتها وحسبتها ووزنتها . . ووجدت أننى عايشه لغيرى . . طول عمرى عايشه لغيرى . . وزوجى كان يرمى فوق دماغى كل شىء . . ويقول لى أنت أم الحلول وأنا أبو المشاكل . . وأعجبنى هذا اللقب . . طول عمرى . . واكتشفت أنه لقب مزيف . . وأنى دفعت كل حياتى من أجل الاحتفاظ بهذا اللقب . . ولم يكن هناك أى سبب يجعلنى أقوم بدور شيال الهموم لكل أفراد الأسرة والشركة . . وإن زوجى الله يرحمه ضحك على . . وأنا ابتلعت هذه الأكذوبة البيضاء ودفعت الثمن غاليا ولا أزال أدفعه . .

وجاء الجرسون يقول لها : تليفون ياهانم . . من المنصورة . .

هى : (تعتذر لرءوف) .

هو : مستنيك مهما كانت المكالمة التليفونية طويلة .

فى الجناح الخاص بها . . تتكلم فى التليفون وتنظر لنفسها فى المرآة طول الوقت . . وقد وجدت فى غرفتها بوكيه ورد كبيراً . . وتنزع واحدة وتظل تشم فيها .

هى : أهلا يادكتور جعفر .
 هو : وحشتنى .
 هى : مرسى . .
 هو : إن شاء الله تكونى مبسوطه .
 هى : جدًا . .
 هو : الحمد لله . . فعلا باين عليك الانسباط .
 هى : من أسعد أيام حياتى . . يمكن أسعدها . .
 هو : إيه الكلام اللى عمرى ما سمعته منك . . إيه السحر اللى
 عندك . . قولى لى .
 هى : قل لى أنت يادكتور .
 هو : تفتكرى نتيجة التحليل إيه .
 هى : مش مهم زى ما تطلع . .
 هو : الله . . جرى إيه يا لطيفة . . إيه اللى حصل . . أنا
 عمرى ما سمعتك سعيدة زى دلوقت . الحمد لله . . قولى إيه الدواء
 اللى بتأخذه من ورايا . .
 هى : الدواء ده غريب . . هوه الداء وهوه الدواء .
 هى : شعر ده والا إيه .
 هى : حقيقة . .
 هو : فوزة . . إيه اللى داء وفى نفس الوقت دوا . . مفيش غير
 الحب بالطيفة .

- هى : تكسب يادكتور . .
- هو : ومن السعيد ده .
- هى : أنا . . إيه نتيجة التحليل قل لى . .
- هو : الحمد لله . . مفيش حاجة ألف مبروك . .
- هى : أنا سعيدة جدًا . . شكرًا يادكتور .
- هو : جايه إمتى . .
- هى : مين يعرف أن نتيجة التحليل بالشكل ده ويرجع . .
- هو : مش راجعه .
- هى : ياربت . .
- هو : يارب إيه اللى أنا سامعه ده . . آجى لك .
- هى : لا . . أنا جاية . .
- هو : إمتى .
- هى : بعد كم يوم . .
- هو : إنت صحيح كويسه . .
- هى : جدًا .
- هو : والسبب ؟
- هى : الدواء .
- هو : اللى هو الدواء .

هى : إيوه ..
هو : الحب .
هى : ليه لأ ..
هو : الحب بالطيفة .
هى : الله .. وهو أنا مش بنى آدم ..
هو : إيوه .. لكن .
هى : والحب له زمن .. له سن ..
هو : لا مالوش .
هى : يبقى خلاص ..
هو : والحب ده ظهر فجأة ..
هى : وهو الحب له قواعد .. له مواعيد ..
هو : لا .
هى : خلاص .
هو : حب قديم وظهر فجأة .
هى : الحب عيل صغير .. الإغريق علمونا كده .. يظهر فى
أى وقت .. ويلعب بأى قلب وبأى عقل ..
هو : صحيح .
هى : أنت مستغرب ليه ..

هو : كلمينى عدل يالطيفة .. أنا متلخبط .. أنت شار
حاجة .

هى : شربت امبارح شمبانيا ..

هو : لوحدك .

هى : حد يشرب شمبانيا لوحده .. الحاجة الوحيدة اللى النا،
بتشربها لوحدها هى الدواء .

هو : وفيلسوفه كمان .. ده أنا مش حاقدرا استناك لحد
ترجعى .. أنا جاى لك ..

هى : اعقل يادكتور أنا اللى جايه لك .. سلم على الجميع ..
هو : وكمان مستعجلة .

هى : الدواء .

هو : اللى هو الدواء .

هى : إيوه (وتضحك) .. تصبح على خير يادكتور .. و
تفكرش فى كل اللى انت سمعته .. لأنك مش حتفهم .

هو :



في مكتبها ..

يدخل الموظفون يسلمون عليها ويجدونها في غاية الأناقة
والسعادة .. ويتهامسون عن الذي حدث لها .. وكيف تغيرت
وأصبحت أهدأ وألطف ..

ابتتها : عيني عليك باردة .. اللهم صلى على النبي .. في غاية
الجمال ياماما .. أنت صغرت عشر سنين ..
هى : ثلاثين سنة ..

ابتتها : والله كلامك مضبوط .. أنت يظهر ياماما كنت في
حاجة للإجازة دى .. أنت رحت فين ياماما ..

لطيفة : (تضحك) في الغردقة وشرم الشيخ وأسوان ..

ابتتها : ياخبر ياماما .. وجالك قلب تسيينا حنجنن عليك ..

لطيفة : جالى قلب .. مش جالى .. وجع لى قلب ..

ابنتها : إيه ده .. شعر ده ياماما .. إيه اللي حصل .. دى
عاويزة قاعدة طويلة .. الحمد لله المهم أنك رجعت فى أحسن صحة
وبلاش وجع دماغ .. بكرة أعرض عليك الأوراق دى ..
لطيفة : لا داعى .. شوفى .. ومشى كل حاجة .. أنت
وأخوك ..

ابنتها : هوه موافق ..

لطيفة : خلاص وأنا كمان ..

ابنتها : طيب ياماما أنا عندى ضيوف .. أسيبك شوية
ياماما .. حمد الله على سلامتكم ونورت الشركة ياماما .. (تقبلها
وتخرج) .

مدير الإدارة : يا أفندم حمد الله على السلامة ونورت يا أفندم .
لطيفة : شكراً .

المدير : انشغلنا على حضرتك .. ولكن الحمد لله .. وعرفنا من
الدكتور أن التحليل فل .. زى الفل .. الحمد لله يا أفندم .. جينا
أمورة سمينها لطيفة .

لطيفة : مبروك .. أنا اللي حاعمل أول عيد ميلادها ..

المدير : ربنا يديك طولة العمر .. ألف شكر يا أفندم ..

لطيفة : بوس لى العروسة وأنا لازم آجى أشوفها .

المدير : شكراً ياهانم .. أستأذن .

لطيفة : اتفضل .

* * *

يدخل رجل فلاح طويل عريض . .

الحاج سالم : نهارك سعيد يا ست هانم .

لطيفة : أهلا يا حاج .

سالم : تحت أمرك يا هانم . .

لطيفة : تعمل صوان . . توزع اللحم . . وتعمل فنة . . وتجيّب
الشيخ عبد الرسول يقرأ . . والشيخ سيد وتدفع لهم كويس . .
بلاش البخل ده يا سالم . . خلى عندك رحمة . . ادفع من جيبى مش
من جيبك .

سالم : بس ليه الكلام ده يا هانم .

لطيفة : ليه ؟ أنت عارف ليه . . بحبها شوية يا سالم . . ربنا
أدانا كثير . . الحمد لله . .

سالم : الحمد لله . . حاضر يا هانم .

لطيفة : دى أقل حاجة . . الحمد لله أنا اطمئنت على نفسى . .
الحمد لله والشكر لله . . وربنا فاتحها علينا . . وكل شىء ماشى
كويس . . الحمد لله . .

سالم : ربنا يسعدك يا هانم ويديك كمان وكمان . .

لطيفة : متشكرة . . اتفضل إنت (السكرتيرة تقرب منها وتمس

فى أذنيها) . بلاش النهارده .. بكرة أعمل عشاء لجميع العاملين
وأنا أقابلهم وأسلم عليهم .. فى النادي .. أحب أشوفهم كلهم ..
إن شاء الله ..

(تخرج السكرتيرة) .

دقات على الباب - إنه الدكتور .. يفتح الباب ويأخذها
بالخضن ..

الدكتور : يا أرض احفظى ما عليك .. اللهم صلى على
النبي .. إيه ده يا اخواتى .. إيه الجمال والصحة .. صغرت
عشرين سنة يالطيفة .. إحنا لازم نقفل عياداتنا كلنا . ونروح
للدكتور الى كنت عنده ونسأل عن الوصفة السحرية الى ترجع البنى
آدم عشرين وثلاثين سنة لورا .. فى مدة عشرة أيام .. إيه الى
حصل .. قولى لى .. الناس بره مذهولين من الى حصل .. قولى
من الأول ..

هى : (تضحك) أشوف التحاليل ..

هو : ادى التحاليل .. كلها عادية جدًا تحاليل الكولسترول
عادى .. الدهنيات والجلسرين عادى جدا .. كرات الدم
عادية .. والله ومن غير حسد .. لو ما كانش عيب .. كنت قلت
تقدرى تتجوزى هاها ..

هى : أعملها يادكتور ..

هو : الله .. الله .. دى أنت مفرشة بقى .. إيه الى حصل

في أسوان . . ولا في شرم الشيخ . . ريجيني . . أسيب الطب . .
والله العظيم عندى استعداد . . لأنه لا يوجد دوا يقدر يغير حال أى
إنسان زى ما حصل لك . . والله العظيم لا يوجد دوا . . ولا يوجد
طبيب يقدر يحقق المعجزة دى . .

هى : أنت مبالغ يادكتور . . مفيش دواء . فيه إجازة وراحة
بال . . والبعد عن (وتشير إلى القاعة والناس) .

هو : البعد عنا . . البعد عن الدكاترة هو أعظم دوا . . والله
صحيح . . السعيد من لا يعرفه الطبيب . . صح وألف صح
كمان . .

هى : كفاية يادكتور . .

هو : لو كنت أعرف أزغرت . .

هى : زغرت . .

هو : فيه جواز قريب ؟

هى : فيه ! .

هو : جد ؟!

هى : إنت مش لسه قايل إننى صغرت ثلاثين سنة . . وأنت
يخلصك واحدة عندها اثنين وعشرين سنة تفضل من غير جواز .

هو : الله . . الله . . دى الحكاية جد بقى !

هى : حتعمل إيه فى مشروع المستشفى .

هو : مستشفى إيه . . إنت طلعتينى سابع سماء . . ونزلتيني

سابع أرض . . مستشفى إيه دلوقت . . خيلنا فى حكاية الجواز . .

هى : خلىنا فى المستشفى . .
هو : بلاش جواز ؟
هى : بلاش . .
هو : انت لخبطينى فيه جواز ولا فيها مستشفى . .
هى : فيه الاثنين . .
هو : عقلى ياناس . .
هى : خليك بعقلك يادكتور (وتخرج) .

* * *

فى أسوان رءوف صدقى جالس فى الفراندة . . يظهر عليه
القلق . . يشرب القهوة . . ويدخن السجائر . . ويتلفت حوله . .
وقد وضع أمامه وردة . . ويسأل الجرسون : الهانم مانزلتش النهارده .
الجرسون : لا يا أفندم .
رءوف : هل نزلت إلى العشاء امبارح .
الجرسون : أنا ماكنتش هنا إمبارح .
رءوف صدقى يتجه إلى التليفون ثم يتردد فى أن يطلبها . . ويعود
إلى مكانه . . ويتلفت حوله . . ويراقب كل القادمين من كل
الجهات . .
وأخيراً ينهض . . ويصعد ويدق بابها . . ويجد الجناح خاليا . .
ويسأل الذين ينظفون الغرفة : الهانم مشيت ؟
فام دى شامبر : إيوه يابيه من إمبارح بعد الظهر . .

رعوف : امبارح ؟ غريبة !
يعود إلى غرفته .. ويسأل عن أرقام شركة لطيفة هانم .. عامل
التليفون لا يعرف .. يطلب مكتبه ويسأل السكرتيرة : ياهدى .
هدى : إيوه ياييه ..
- عاوز تدورى لى على نمر الشركة .. وتعرفى لى النمرة المباشرة
بتاعة لطيفة هانم .. وتردى على بسرعة .
هدى : حالا ياييه .
رعوف : شكراً .
هدى : سأل على حضرتك .
رعوف : بعدين ياهدى .. شوفى لى النمرة دى أولاً .. وإن حد
سألك قولى أنا قاعد هنا كام يوم ..
هدى : أمرك ياييه ..

* * *

لطيفة فى بيتها .. تراقب برامج الألعاب الرياضية فى
التليفزيون .. تؤدى نفس الحركات .. وتضع كاسيت عن
الرقص .. وتحاول ترقص ..
لطيفة لنفسها : أنت والله حتجننى يالطيفة .. (وتضحك) .
وتدق الجرس وتجىء الخادمة وتسألها : عندك إيه عشاء
ياسيدة ..
سيدة : شوربة .. وفراخ مسلوقة وخضار مسلوق وبيضة
مسلوقة وفاكهة .. وجبنة .

لطيفة : لا . . بلاش جبنة .

سيدة : وعيش سن . . ولا بلاش ؟

لطيفة : بلاش .

سيدة : الدواء إيه ياهانم .

لطيفة : مفيش دواء .

سيدة : الدكتور بعث لحضرتك كام قزازه كده .

لطيفة : الدكتور ؟ كام قزازه . . هات القزازه دى أشوفها . .

(تفتح لفة صغيرة . . وتضحك) لقد بعث لها الدكتور بعدد من زجاجات البارفام) تضعه في سريرها تتخيل نفسها مع رءوف صدقي يرقصان ويشربان . . وتتخيله يعانقها ويقبلها . . وتتخيل نفسها عروسا له . وتتلفت وراءها فتجد عددًا كبيرًا من الأطفال . وتضحك .

وتصحو من هذا الحلم وتتقلب في فراشها . . وتظهر صورة زوجها . . زفافها مع زوجها . . وكانت سعيدة . . ثم تدخل غرفة النوم وتتعر في فستانها وتسقط على الأرض وزوجها يضحك ولا يمد يده لكي تنهض . . وتغضب . . وتتخيل نفسها مع رءوف . . وتتعر في فستانها وبسرعة يدركها رءوف قبل أن تسقط . . وتتخيل نفسها ترقص وتغنى وهي مخمورة . . بينا أولادها والمديرون في حالة من الدهشة والغضب . . ولكنها تصرخ فيهم جميعا : كفى . . لقد عشت من أجلكم طول عمري . . والآن من حقي أن أعيش لنفسي . . وتصرخ فيهم : اخرجوا . . عليكم اللعنة . . (كأنها يوسف وهبي . .) وتضحك في نومها وتطفى النور وتنام . .

وفي أسوان يجزم رءوف صدقى حقائقه .. والحزن واضح عليه
والغضب ..

ثم ينزل إلى مدخل الفندق .. ويقابل رجلا ويقول له : كلامك
كله مش مضبوط ..

الرجل : أشوف إيدك تانى .. هات إيدك ياسعادة البيه
ويجلسان فى جانب من مدخل اللوكاندة .. رءوف يعطى يده لقارئ
الكف ..

قارئ الكف : زى ما قلت لسعادتك .. حكاية حب قديمة
اتجددت .. والحب ده آخرته سعيدة .. إن ما حصلش يبقى ما
أفهمش حاجة .. لكن إذا حصل أنا لى الحلاوة .. والله مش
حتنازل عن الحلاوة دى .. وحتكون حلاوة كبيرة حب قديم ..
شعل النار فى قلبك وفى قلبها .. هى بتحاول تهرب ولكن مش
حتقدر .. وراها ياسعادة البيه .. اسمع كلامى .. وراءها ..
صنف النساء كده يابيه .. تجرى وراها تهرب منك .. تهرب منها
تجرى وراءك .. وراها وأول ما تجرى وراك اهرب .. والنتيجة
مضمونة .. بكره تقول أبو المعاطى قال .. وكلام « أبو » المعاطى
ماينزلش الأرض .. ومش حاخذ منك حاجة يابيه بس سيادتك
تدينى عنوانك فى مصر ..
(يعطيه كارتا عليه العنوان) .

* * *

لطيفة أمام المرآه .. تنقى فساتينها وتسوى شعرها وتتحدث إلى

نفسها : رءوف .. رءوف صدقى .. فيفو .. رءوف .. رءوف .. رءوف ..
آر اس .. رءوفة .. لطيفة .. لولا .. فافا .. توفى ..
طفطف .. رءوف .. أحسن .. مدام رءوف صدقى .. أنا
مدام .. بلاش .. وتحلم .. وتسرح من جديد ..

وتتوقف فجأة عن ارتداء ملابسها .. وتتكلم فى التليفون تقول :
أنا تعبانه النهارده .. مش عاوزه حد يتصل بى هنا .. تعبانه ..
عاوزه استريح شوية .. أنا امبارح تعبت جدًا ..

وترتدى الروب .. وتتمدد فى السرير .. وتتفرج على
التليفزيون .. وتقلب فى مجلة .. وتتمشى فى البيت .. وتقف فى
الشرفة .. وتنظر إلى كل اتجاه ..

وتجىء الخادمة ومعها باقة من الورد ..
وتندهش لطيفة ..

وتقلب فى باقة الورد وتجذب بطاقة تقول : حمد الله على سلامتكم ..
رءوف ..

وتضحك .. وتظهر السعادة على وجهها .. وتختار لنفسها وردة
وتشمها .. وتسرح ..

اجتماع مجلس الإدارة ..
معالم القاعة تغيرت ..

على الجدران صور : انديرا غاندى ومرجريت تاتشر والملكة
حتشبسوت وكليوباترة وشجرة الدر ومارلين مونرو وصورتها هى ..

والورد كثير في كل الأركان الحمراء أمامها هي .. يتناقشون في مشاريع الشركة والتوسعات والعلاوات وتحويل العملة .. والصادرات إلى الدول الإفريقية .. وروسيا ..

وتدخل السكرتيرة تهمس في أذن لطيفة هانم .. التي يظهر على وجهها الاضطراب والغضب .. وتقف السكرتيرة تنتظر أوامرها ..

لطيفة : طيب ينتظرنى فى مكتبى .. أكمل اجتماع مجلس الإدارة .. ثم تستأذن على أن يتولى ابنها إدارة الجلسة ..

وتخرج .. وتسوى شعرها .. وتضع بعض العطر على وجهها .. ثم تجفف بعض العرق على وجهها .. وفى مكتبها تجد رءوف صدقى .

لطيفة : أهلا يارءوف بيه .

رءوف : إيه اللى أنت عملتيه ده يالطيفة .. إيه اللى حصل ..

لطيفة : مفيش حاجة .. أنا مش عاوزه حاجة تحصل ..

رءوف : يعنى إيه .

لطيفة : يعنى أنا صدقت كلامك .. وتبها لى أننى صغيرة ..

واندفعت فى عواطفى .. ونسيت .. وكان لابد أن أتوقف ..

رءوف : طيب وإحساسى أنا .. واللى أنا قلته واللى أنت قلتيه لى .

لطيفة : اندفاع .

رءوف : اندفاع من .. أنا مندفع .. ولكن اندفاع الرجل

العاقل .. شعورى كان أقوى .. فاندفعت بمنتهى الصدق

والأمانة . . مش اندفاع واحد متهور . . ولكن اندفاع واحد بقى له
سين مستنى الأتوبيس . . وأول ما شفته اتشعبت فيه . . فأنا
عارف . . الى عملته . . وتخيّلته وتمنيته . . وما صدقتش نفسى . .
ومش نادم على أى كلمة ولا أى لمسة . . ولا أى حلم أو خيال .
لطيفة : ولا أنا . . وأنا قلت لك أنت مش عارف إيه الى أنت
عملته فيّ .

رعوف : إيه الى حصل . . ليه سافرت فجأة . . وإمتى قررت
أنك تسافرى وترجعى القاهرة . . لما كنا بنتعشى ولما كنا بنشرب
شمانيا ولما كنا بنرقص . . ولا لما كنا فى الأسانسير وقلت لى إنك
بتحبينى . . وإن دى أول مرة فى حياتك تقوليها لأى إنسان . . وأنا
صدقتك . . ولسه مصدقك . . إحنا مش صغيرين يا لطيفة .

لطيفة : علشان إن احنا مش صغيرين لازم نفكر بعقل الناس
الكبار . . وفى مواجهة الكبار الى حوالينا . . أولادنا وأحفادنا
والموظفين والقرايب . .

رعوف : كل دول ملهمش وجود . . وما كانش لهم وجود واحنا
بنرقص . . ما لهمش وجود واحنا عندنا أرق وقلق . . واحنا بنقول آه
من الصداع واحنا بتتحايل على النوم إنه يبجى ما يجيش . . واحنا
لوحدنا كل واحد فى سريره مع همومه مع متاعبه . . مع وحدته
وينتظر القدر . . ويكون السرير زى الثابوت . . ويكون النوم
والموت لهما معنى واحد . . فىن العالم كله وأنا بأفكر أطفش من البلد
ومن الناس . . علشان أعيش لوحدى وأموت لوحدى . . الناس

احنا اتعودنا نحشرهم فى أخص خصوصياتنا . . وكل واحد منهم
يستأنف حياته على كيفه وعلى مزاجه . . ويريدون منا ألا تكون لنا
حياة . . إنهم يخافون على أنفسهم . . على فلوسهم . . على نصيبهم
من الشركة . . إن أحب الناس لنا يفكر جادًا متى نموت وإيه
نصيبه من التركة . . صدقيني أنا سمعت واحدًا من أولادى يقول
كده . . وهو مش شرير . . لكن كلام بالعقل . سمعته يقول
لاخوه . . افرض بقى أن بابا ضحكت عليه بنت صغيرة واتجوزته . .
وكتب لها كل اللى قدامه واللى وراه . . وكان رد أخوه : هوه حر . .
دى فلوسه وهو حر فيها . . وكفاية اللى احنا أخذناه منه . . أخذنا
ما هو أكثر من الفلوس . . صحته وشبابه . . لم أنس هذا الحوار . .
وأعتقد أن ابني كلامه صحيح . . رغم أنه بيحبني . .

(ويقرب يحاول أن يحتضنها أو يقبلها) .

لطيفة : رءوف . . هنا مكتب . . مش لوكاندة . .

رءوف : (فى حالة غضب) أريد أن أعرف . . أريد تفسيرًا لما
حدث . . أنت غيرت رأيك . .

لطيفة : إيوه أنا غيرت رأيى .

رءوف : انتى غيرت رأيك . . وأنت هناك . . ولا لما رجعت
هنا . . وليه . .

لطيفة : هناك .

رءوف : امتى . . فين . . وليه . . طيب إيه الكلام اللى

صدق . . وإيه الكلام اللي كذب . . عاوز أعرف (بصوت مرتفع)
عاوز أعرف دلوقت . .

لطيفة (فى فزع) متعلّش صوتك هنا شركة . . أنت عاوز تعمل
لى فضيحة . . اسكت . . بعدين . .

رءوف : وأنت مش عارفه إنه كان فيه فضيحة فى أسوان . .
الناس اللي شافونا صباحا ومساء نتعشى ونتغدى ونتعشى ونرقص . .
وبعدين واحد منهم قال : المدام كتبت عنوانها ومشيت . . ما
تعرفيشى كانت سعادتى قد إيه . . لما قال لى : المدام . . ومتعرفيش
تعاستى كانت قد إيه لما قال إنها مشيت . . كلمة مشيت كان لها وزن
هربت . . طفشت مع واحد غيرك . . فضيحة طبعاً . . الفضيحة
هناك أبشع من الفضيحة هنا . . عاوز أعرف دلوقت !

(التليفون يرن . . مرة بعد مرة . . وفجأة تظهر السكرتيرة تجدهما
واقفين . . وتقفّل الباب بهدوء . . وفى فزع) .

وتمنع السكرتيرة الابنة والابن من الدخول . . وتقول إنها مشغولة
الآن وإنها طلبت ألا يدخل لها أحد . .

وفجأة يفتح الباب ويخرج رءوف صدقى . . وينظر إلى الواقفين
أمام الباب . . وتلاحظ ابنتها على شفّته « روج » . . ويمتقع
وجهها . .

وتدخل لطيفة دون أن تطلب إلى أحد منهم أن يدخل . . وتدخل
الابنة لتجد أمها وقد جلست إلى مكتبها والدموع فى عينيها وتحاول أن

تقترب منها . . ولكنها تتردد ثم تخرج وتشير إلى أخيها أن يتبعها . .
وتدخل السكرتيرة وتجد لطيفة هانم تبكى . . فتغلق الباب بهدوء .
في البيت تجد في انتظارها الدكتور وأخته أمينة وخالته وشريفة . .
مفاجأة للطيفة هانم . .

لطيفة : إليه المفاجأة السعيدة . . ماحدث قالى لى إنكم هنا . .
الدكتور : إنها غلطتى . . أنا كان لازم أقول لك . . قلت علشان
نسلم ومانقعدش كثير . .

لطيفة : أهلا . . وسهلا .

الدكتور : أختى أمينة .

لطيفة : أهلا وسهلا .

الدكتور : أمى . . زى أمى خالتى شريفة . .

لطيفة : أهلا وسهلا . .

الدكتور : أختى مسافرة أمريكا لأولادها . . وجات تسلم عليك
قبل ماتمشى . . وخالتى قررت نهائيًا أنها ترجع المنصورة . . بقى لها
عشرين سنة فى القاهرة . . وطلع فى دماغها ترجع تعيش مع
الأسرة . . أصل احنا بتطلع فى دماغنا حاجات كدة . . احنا ناس
على الله . .

لطيفة : وأنت طلع فى دماغك إيه يادكتور . . أولا متشكرة على
قزايز الدواء اللى أنت بعتهالى . . ألف شكر . . كلك ذوق . .

أمينة : آه . . لكن مالوش بخت . .

الدكتور : أجييه منين ..

لطيفة (تنادى على الخادمة) حضرى السفرة ..

الخادمة : جاهزة يا هانم ..

لطيفة : عن إذنكم دقيقة واحدة . (يدق جرس التليفون)
تدخل بالتليفون بعيدًا وتهمس ..

لطيفة : يارءوف مش حاقدر .. مش دلوقت .. عندى
ضيوف .. حاقول رأى النهائى .. إيوه .. بالليل كلمنى بالليل ..
طيب بلاش أنا الى حاطلبك .. إيوه أنا الى حاطلبك ..
(تقفل السكة) .

أمينة : إنت إيه الى عاجبك فى لطيفة يادكتور ..

الدكتور : إيه ؟ كل حاجة ..

أمينة : كبيرة .. يمكن أكبر منك .

الدكتور : أنا عارف سنها باليوم .. هى أصغر منى بخمس
سنوات وستة شهور وعشرين يوما .. وعاجبانى .

أمينة : يعنى هى واللازينات . بنت عمته ..

الدكتور : زينات إيه يا شيخة ..

أمينة : سبحان الله مش هيه دى الى كانت عاجباك .. وقلت
فيها شعر .. عينيها .. جسمها .. شعرها .. صوتها ..
مشيتها . سبحان الله .. أنت كل يوم بحال وبرأى .. ويمكن

تغير رأيك في لطيفة دى وتقول أنا السبب . . يا حبيبي يا خويا أنا
ماليس دعوة . . طانط هي اللي تتكلم . . الكلمة كلمتك ياطانط
إنت إيه رأيك ؟

شريفة : قبل ما أتكلم يادكتور . . دلوقت انت مالى إيدك
منها . .

الدكتور : إيوه .

شريفة : بقى هي بتحبك زى ما أنت بتحبها . .

الدكتور : إيوه . .

شريفة : يعنى وجودى هنا مسألة شكليات . . والللا انت
عاوزنى أفنعها أنها تنجوزك . . يعنى هي محتاجة لكلمة منى . .
يعنى هي عاوزة أن العيلة هي التي تخطبها . . يعنى هيه موافقة
عليك . . وناقص موافقة العيلة . .

الدكتور : إيوه . .

شريفة : إيوه دلوقت أنا عرفت إيه المطلوب منى . . طيب
أكلمها إمتى . . على الأكل . . والللا بعد الأكل . . طيب هل
معك هدية لها . .

الدكتور : الهدية وصلت . . بس الخدمة نسيت تديها لها . .

شريفة : معقول تنسى حاجة زى دى . .

الدكتور : إيوه مش معقول . .

شريفة : إيه القزايز اللي بتشكرك عليها . .

الدكتور : الهدية مع القزايز . . يظهر ما شفتشى الخاتم الألماس
الى أنا بعته مع قزايز البارفام . حتعرف حالا . .

شريفة : مرة ثانية يادكتور . . هى موافقة على الجواز . .
الدكتور : إيوه . .

شريفة : طيب كويس وأنا أقول لها إن احنا سعداء بيها ومتشرفين
بيها وبعائلتها . . وعاوزين نفرح بيبكم قبل ما أسافر وقبل أختك ما
تسافر . . وحيكون حفلة على الضيق . . واللا حفلة كبيرة . .
ويا ترى هى لازم تاخذ رأى أولادها . . أوحتى تديهم خبر . .
الدكتور : ده شأنها هى . .

شريفة : إزاي وانت مش عاوز تقنع أولادها . .
الدكتور : لا . . ده شأنها هيه . .

شريفة : برضه لازم .

الدكتور : بعدين ياطانط . .

شريفة : يعنى الكلام بيحى بعد الأكل واحنا بنشرب القهوة .
الدكتور : إيوه . .

شريفة : أنا الى حاتكلم واللا اختك واللا احنا الاثنين .

الدكتور : انت الأول .

شريفة : طيب على بركة الله .



- لطيفة هانم فى بيتها . .
- وهناك سيدة تقوم بتدليكها . . وفى نفس الوقت تشاهد برنامج
ايروبك . . وتقوم ببعض الألعاب الرياضية . .
- وتحجى الخادمة وتقول : الدكتور .
- لطيفة : ماله .
- الخادمة : على التليفون .
- لطيفة : معقول ؟
- الخادمة : إيوه يهانم . . دى رابع مرة يطلب النهارده . .
وامبارح طلب يمكن ست مرات . .
- لطيفة : للدرجة دى . . وكنت بتقولى له إيه ؟
- الخادمة : ما كانش مصدق أن جنابك مش فى البيت . .
- لطيفة : يعنى إيه .

الخدامة : إنك مش عاوزه تكلميه . . هوه اللي كان بيقول كده . .

لطيفة : هاتى التليفون .

تتكلم فى التليفون . .

لطيفة : أهلا يادكتور . . أبدا والله . . انت عارف انت عزيز على
قد إيه . . ولكن أنا ماعنديش أى استعداد نفسى . . ولا عندى
استعداد أواجه الناس وإننى فى حالة دفاع عن النفس . . أنا
عارفة . . أنا متأكدة . . كله نصيب . . وأنت فى حاجة إلى واحدة
أحسن . . أنا لا أصلح والله . أنا عارفة نفسى . . أنا متأكدة . . أنا
متشكرة جدًا يادكتور . . بكرة إن شاء الله . . أهلا وسهلا فى أى
وقت . .

الخدامة : نسيت يا أفندم أقول لسيادتك إن الحاج عمر اتكلم
امبارح . .

لطيفة : كمان الحاج عمر . . إية الحكاية . . ما بقاش غير الحاج
عمر . . وإيه اللي عند الحاج عمر يقدر يديه لى . . ده راجل أتجوز
ثلاث مرات . . وأنا الرابعة . . قولى له الهانم عندها ضيوف . .
وهى حتطلبك بعدين . .

تخرج الخدامة وتدخل . . ومعها بوكيه ورد . .

لطيفة : من مين ؟

(وتظهر السعادة على وجهها . . وتكون البطاقة لرؤوف صدقى
مع القبلات الحارة . .)

سيده التديك تسألها حنكمل يهانم . . والا آجى لحضرتك
بكره .

لطيفة : تعالى بكره . .

(تنهض المدلثة وتخرج . .)

الابنة : (تدخل) أهلا ياماما . . مالك سلامتك . . إنت زى
الفل اهوه . . فيه إيه . . دلع عرايس بقى . .

لطيفة : (تضحك) . .

الابنة : مش كده ياماما . . انت مش عروسة واحدة . . أنت
على الأقل ثلاث عرايس . .

لطيفة : (تضحك)

الابنة : قالوا عروسة الدكتور . . وقالوا عروسة الرجل الرذل الى
بيقف بعربيته الكاديلاك أمام الشركة تحت الأشجار . .

لطيفة : مين ده كمان ؟

الابنة : حضرتك مش عارفه . . مش معقول . .

لطيفة : والله ما أعرف . .

الابنة : العاشق الوهان البلبل الحيران . . صاحب الشركة
إياها . .

لطيفة : (سعيدة) يقف بعربيته تحت الشجر . .

الابنة : إيوه تحت الشجر ياوهيه . .

- لطيفة : أول مرة أعرف . .
- الابنة : وقالوا كان العمدة . .
- لطيفة : العمدة . . مين الحاج عمر . . وأخبار الرئيس الأمريكي
ما حدش جاب له سيرة كان ؟
- الابنة : لسه شوية ؟
- لطيفة : إيه الهوجة دى .
- الابنة : ياماما . . يعنى مش عارفة .
(ويدخل ابنها) . .
- الابن : لازم بتتكلموا علىّ .
- الابنة : أبدا ولا جبنا سيرتك . . واحنا حنجيب سيرتك ليه . .
إحنا بتتكلم على العرسان بس . .
- الابن : ما أنفعش عريس .
- الابنة : عريس لماما ؟ تنفع جدّا . .
- لطيفة : (تضحك) .
- الابنة : الحقيقة إيه ياماما . .
- لطيفة : كل اللي سمعته حقيقة . . لكن يا ابنى أنا ما أقدرش . .
فى سننى دى . .
- الابنة : إيه فى سنك دى . . إنت زى القمر . : وألف واحد
يتمناك . . عقل وجمال ومال . . من الناحية دى مفيش فيها كلام . .

الابن : تمام .. ولكن إيه اللي خلى العرسان كده يهلوا مرة واحدة ..

الابنة : لادى حكاية قديمة .. الدكتور بيزن من زمان .. وماما مصرة أنه أخ لها .. ولبابا .. والرجل العبيط الحاج عمر كان كل يوم بيعت للماما قفص فراخ .. ومادامت قبلت الهدية .. (تضحك) .. وغير دول كثير .. وأنا عارفة ومش حاقولك لأن ماما قالت لى ماتقوليش .. مايصحش ..

الابن : يعنى انت بتغظيني .. ولكن عاوز اسألك ياماما .. انت عارفه اننا بنحبك .. ونتمنى لك السعادة .. والله بأقولها من قلبى ياماما .. ليه لأ؟ حقك ..

لطيفة : معقول حاجة زى دى وأنا أجعلها مفاجأة لكم .. معقول انتى أفكر فى الزواج .. مش الزواج نفسه من غير ما آخذ رأيكم .. هل هذا معقول .. مش معقول يا ابنى ..

الابن : طيب ياماما ما تخليها حاجة معقولة . وأنا موافق على أى واحد انت تختاريه .. أى واحد ياماما .. وأنا عارف عقلك وبعد نظرك .. والله أى واحد ما دام يسعدك ..

لطيفة : بلاش السيرة دى ..

الابن : طيب إذن أقول لك آخر الأخبار .. عندى عريس .. أصغر منك بعشر سنين ..

لطيفة (تضحك) كمان؟

الابن : ورجل غنى جدا .. ويحترمك جدا .. وهو زهقان من حياته .. وعاوز يعيش سعيدًا . وأنا موافق .

لطيفة : يعنى اتكلمتم مع بعض .. وقررتم ومطلوب منى أطيع هذه الأوامر ..

الابن : إيوه ياماما .. احنا كده فى الريف .

الابنة : مين .

الابن : عمك ؟

الابنة : إيه !

لطيفة : مين ؟

الابن : عمى مختار .. مش عاوز فلوس .. عنده كثير ..

لطيفة : وانت ترضى ؟

الابن : أنا أرضى .

لطيفة : وانت ترضى ؟

الابنة : ياخبر .. ايه الحكاية دى .. عمى يبقى جوز أمى ..

وأصغر منها .. واتجوز قبل كده ثلاث مرات واللا أربع مرات ..

وعنده عشرين عيل .. إزاي توافق على حاجة زى دى .. انت

جرى لك إيه .

لطيفة : آهو كلام يابنتى وكل واحد يقول اللى يبسطه ..

تدخل الخادمة : تليفون ياهانم .

لطيفة : مين ؟

الخدامة : (تحنى رأسها)

الابنة : قالت لك مين ؟

الخدامة :

الابن : سر حربي .

الخدامة :

(تخرج الأم وأدركت من هو الذى يتكلم . . وأخذت التليفون
ودخلت غرفتها وأقفلت الباب عليها) .

على طرف السرير راحت تتحدث إليه :

رءوف . . أنا قررت . . بلاش . . أنا شايفة نفسى مضحكة . .
بلاش . . أرجوك . . إذا كانت لى معزة عندك بلاش . . والله بأقولها
من عقلى . . مش من قلبى . . لكن احنا فى سن العقل مش
القلب . . مش حاقدرا أقول لك الكلام وجها لوجه . . ما
أقدرش . . أولادى هه . . طبعاً عاوزين أعمل اللى عاوزاه . .
تخطبنى من أولادى إزاي . . بلاش الحاجات دى . . ما أقدرش . .
لا ما تبيض . . خلاص نتقابل . . خلاص . . الساعة التاسعة . .
تصبح على خير . .

جاءت سيدة التدليك . . وهى لا ترد على التليفونات . .

والساعة تجاوزت التاسعة مساء . . والخدامة تمس فى أذنها . .

والضيق يظهر على وجه لطيفة . .

الساعة العاشرة ولم تذهب إلى الموعد . .
نادت الخادمة وقالت لها : لا مكالمة من أى أحد . . ولا
أولادى . . قولى الست نامت بدرى . .
الخادمة : أى حد .
لطيفة : أى حد . . وأولادى كمان . تصبى على خير . .
الخادمة : وأنت من أهله ياهانم . .
فى غرفة نومها . .

تسمع الموسيقى . . ثم تفتح التلفزيون وتقفله . . وتدخن . .
تحاول أن تنام . . الخيال يسرح بها فى كل اتجاه . . تعود إلى
البلكونة . . تحاول أن تتصل به تليفونيا . . تسحب الفيشة
للتليفون . . تتمشى فى الغرفة . . تفتح دولابها . . تخرج كل الهدايا
وكل الخطابات . . والفساتين . . وتقلبها . . وتقول لنفسها . .
والله باحبك يارءوف ولكن مش قادرة . . مش عارفة يبقى إزاي أكون
زوجة لرجل ثانى . . مش عارفة . . ومش عارفة أولادى إزاي
مسهلين الحكاية على . . أنا - إذن - غير طبيعية - مش لاقية حد
أكلمه . .

وتضع كل الهدايا فى شنطة ومعها الفساتين والكروت
والخطابات . . ثم تجلس تكتب خطابا لءروف . . وتقول : عزيزى
رءوف . . لا . . إيه يعزىزى دى . . امال حاقول حيبى . . لا ولا
حتى . . أقول رءوف بس . . رءوف أنا قلت لك كل حاجة وأنت

مصر على موقفك . . وأنا أحترم موقفك وأنت لازم تحترم موقفى . .
وأنت مستعد لهذا الموقف من زمان . . وأنا مفاجأة تماما بكل
شئ . . وإن كل حاجة قلتها اسعدتنى . : آه لو رأيت السعادة على
وجه أولادى . . أو على وجهى أنا وأنا أفكر فيك . . آه لو رأيت
التعاسة على وجهى الآن . . وأنا أستعرض كل شئ يفكرنى بيك . .
بذوقك الجميل ورقتك . . ومش عارفة أواجه كل الحاجات دى كل
يوم إزاي . . ما أقدرش انها مظاهره كلها تهتف بحياتك وتهتف
ضدى . . ولذلك اتخذت قرارا لكى أفرق هذه المظاهرة الصامته . .
أبدا مش صامته . . مظاهرة صارخة فى عيني وأذنى وفى دمي وفى
قلبي . . إن كل شئ فى جسمى وفى عقلى وفى قلبي يعمل
بحساب . . وصدقتى . . إنها مؤامرة ضدى . . انقلاب ضدى . .
إنهم جميعا يحملونك على الأعناق وينادون بك سلطانا على عرش
حياتى . . وأنا وحدى أقف ضد التيار . . ولا بد أن أقف . . كثيرون
فعلوا . . كثيرون . .

(وتفتح الخطاب فى مظروف وتبتلع بعض الحبوب المهدئة وتنام) .

الخدامة (فى التليفون) والله الهانم ما نامتش امبارح . . يمكن
على وش الفجر . . أنا شايفها بتعمل لنفسها قهوة وشاى . . أول
مرة حاجة زى دى تحصل . . والله ياست مش عارفه . .
يدق جرس التليفون . .

الخدامة : صباح النور يايبه . . ماما لسه نايمه . . لأ مش
تعبانه . . قلقانة بس . . ما قالتش أصحيتها من النوم إمتى . . طبعا

لابد أسيبها نايمة .. لأنها سهرت امبارح .. يمكن للساعة
خامسة .. يمكن ستة .. الله أعلم .. لا التليفون ما ضربش ولا
مرة .. لا ماعرفش لكن أظن الهانم شايلة الفيشة .. أخت
حضرتك كانت بتتكلم من شوية .. هيه امبارح قالت لى ما
توصلنيش بأى حد .. حتى أولادى .. إيوه يابيه قالت كده ..

تخرج لطيفة هانم من غرفة النوم وقد ارتدت ملابسها كاملة ..
الملابس قاتمة على غير العادة .. وفى يدها الحقيرة الكبيرة التى
وضعت فيها كل الهدايا .. ونزلت من غير أية تعليقات للخادمة ..
جاء السائق .. أشارت بأنها هى التى سوف تقود سيارتها .. ووضع
الحقيرة إلى جوارها ..

واتجهت بسيارتها إلى إحدى العمارات . وركبت السيارة .
وأخرجت الحقيرة من مؤخرة السيارة . ونظرت إلى نفسها فى المرآة . .
وصعدت الدرج . . ثم دخلت الأسانسير . . وخرجت أمام مدخل
شركة . . ودخلت . . وقابلتها السكرتيرة فقالت لها لطيفة : رءوف
بك موجود . .

السكرتيرة : مين يا أفندم .

لطيفة : لطيفة .

السكرتيرة : موعد سابق .

لطيفة : إيوه . .

السكرتيرة : إمتى .

لطيفة (تضحك) من زمان . .

السكرتيرة : أفندم ؟

لطيفة : من ثلاثة أيام . .

السكرتيرة : الساعة دى .

لطيفة : إيوه . .

السكرتيرة : لحظة ياهانم (وتشغل بقراءة بعض الأوراق)

ولكن لطيفة تسبقها وتفتح الباب . . وتترك الحقيبة عند
السكرتيرة . .

تدخل لطيفة . . وتظل واقفة . . ورءوف جالس وقد وضع وجهه
بين يديه . . ولا تزال لطيفة واقفة . .

ثم تجلس وتخرج مرآتها . . وتضع الأحمر في شفيتها . . وتخرج
زجاجة العطر وترش على وجهها وناحية رءوف . . ويتنبه قليلاً
لرائحة العطر . . وتتجه ناحيته وتقول له : رءوف .

رءوف : . .

لطيفة : انفع ؟

رءوف (يبتسم) . .

لطيفة : تقبل أكون مراتك . .

رءوف : (يضحك)

لطيفة : . . تحب أكون مراتك ؟

رءوف : (يضحك سعيدًا) .
لطيفة : بلاش تحب .. أرجوك يارءوف (يضع يده على فمها) .
- بل أنا اللي أرجوك بالطيفة .. يا أطف لطيفة ..
ويخرجان من المكتب وقد لف ذراعه حولها .. والسكرتيرة تحمل
الحقيبة .. ويتجهان من الأسانسير إلى الشارع ..
ويفاجآن بأن الأبنة خرجت من سيارتها ..
والابن خرج من سيارته ..
وكذلك عدد من المديرين ..
ويتقدمون جميعًا نحو لطيفة ورءوف .. ويصفقون وينزل الاثنان
السلام بهدوء ليجدوا سيارة وقد ازدانت بالورد ..
رءوف : سيارتك ؟
لطيفة : (تهز رأسها) .
رءوف : على فين ؟
لطيفة : ...
رءوف : على فين (ضاحكًا سعيدًا) .
لطيفة : على المطار !
رءوف :
لطيفة : أسوان ..